

王湘綺先生全集

湘軍志



湘軍志

十卷

宣統元年己酉
冬重刊于東洲



湖南防守篇第一

湘軍志一

自古言軍勢者多侈言形勝要害積疆弱之故然其實非也項羽繆言郴爲天下上游湖南自郡縣以來曾未嘗先天下 國朝移行省於長沙復漢國制控扼十六大城以防苗故鎮筵頗有精兵出征四方至其財賦全盛時才敵蘇松一大縣院司之選在直省下等咸豐初元巨寇洪秀全自全州出永郴圍省城掠舟洞庭遂連破名省天下莫能當 文宗憂之詔湖南治團練善後以鄉人副巡撫湘軍始萌芽矣方圍城時官吏倉皇治軍劣愈於武昌安慶其後湘軍日彊巡撫亦日發舒體

湘軍志一

日益尊至庭見提鎮易置兩司兵餉皆自專湘軍則南至交趾北及承德東循潮汀乃渡海開臺灣西極天山玉門大理永昌遂度烏孫水屬長江五千里擊櫟聞於海自書契以來湖南兵威之盛未有過此者也無他故專滅洪寇之功耳然而洪寇之盛則亦由湖南始始合圍而縱之後起偏師追而殲之豈天數邪一二人謀力之所致也道光三十年五月庚戌廣西亂始上聞其時慶遠平樂潯州在在劫掠而名者陳亞貴廣東英德盜掠浚光戕守備走懷集湖南始戒嚴駱秉章爲巡撫九月 詔徵鎮筵兵二千詣梧州從兩廣總督進征起李

星沅於長沙授欽差大臣專赴廣西又命秉章出境防勦秉章奏省城居中宜鎮定且飭邊吏屯戍十二月陳亞貴平乃討金田金田村者潯州倚郭桂平縣地前史所稱大藤峽也其西則武宣貴縣土客民自來襍居相讎姦民楊秀清利客豪資說令求土民女爲妾又自至土家激撓之因勸豪劫女使相攻燒眾無所歸秀清則悉劫之以叛有眾數千惡自倡亂乃投金田合於洪秀全自明末西夷人以數算新法詫中國因得布其祇教愚民傳奉世代秘守婦女尤惑之秀全亦假以招誘懼官吏訛索遂拒險屯結秀清至自言通天語秀全當

湘軍志一

二

爲天兄咸豐元年僭號天王出掠旁縣廣西巡撫周天爵提督向榮將萬人并前發諸軍四千餘人圍之大黃江星沅天爵不相下奏請統帥大學士塞尙阿帥二都統將四千五百人駐湖南爲聲援四月詔塞尙阿代星沅星沅薨寇自武宣潰圍東北走象州秉章奏言湖南防兵四千餘前詔提督余萬清出境會攻力不足命總督程番采行邊六月寇還武宣八月潰圍大破巴清德軍東走藤北犯永安陷之余萬清母喪解官留營九月鮑起豹爲提督屯江華二年二月永安寇潰圍直北趨陽朔四總兵敗死遂圍廣西省城余萬清將千

人往援屯北門三月郴盜劫餉銀殺知州胡禮箴四月寇解廣西省城圍東北陷興安全州撤七千人追之以和春將壬寅寇入湖南境將趣永州阻水退走道州余萬清先還守道州城總督駐衡州聞寇遽乘舟北走萬清亦棄城不守乙巳道州陷巡撫委事總督總督聞永州寇退復還衡州六月庚辰朔塞尙阿移駐永州合兵二萬餘人圍寇道州檄鮑起豹還長沙丁亥寇分陷江華殺知縣劉興桓壬辰陷永明丁未陷嘉禾戊申陷藍山七月己酉朔陷桂陽州知州李啓詔走死庚戌陷郴州殺知州孫恩保 詔罷駱秉章逮治余萬清以羅繞

湘軍志一

三

典治軍長沙料兵唯二千餘人練勇三千餘人巡撫張亮基未至總督程喬采託衡防不來秉章繞典方議築土城禁譎言未能謀兵事也寇既陷郴疑所往已未走永興殺知縣溫德宣分黨踞之大軍悉移永興蕭朝貴者以膽譎自奮謂羣寇遲悞獨率千餘黨謀襲長沙繞山道東北行百九十里掠安仁丙寅陷之北犯攸丁卯陷之遂過醴陵丙子至省城南十里止城中料寇當從耒衡正道來民走報寇至怒其無公文執將斬之石馬鋪屯將尹培立以潼關副將率陝西軍千人倉卒拒戰陝軍不慣稻食所屯地無麩皆買之城軍未朝食相

持一時許皆潰散培立死之於是潰軍或走城中巡撫方巡城乃遽還塞南門然猶不知何軍潰敗城外居民亦不知寇已至蕭朝貴設幕城南有楊生者誤以爲達官上謁獻策朝貴領之俄而寇將至怪問何人朝貴曰此楊先生條程事者生覺蒲伏幕後踰山走而寇望城東南隅高樓以爲城樓趨之則非門返而南門塞城中乘城分守矣寇據郭外民居不知所以攻但發礮擊城礮丸及城中街有賣漿者方食而碎其盃城中大震或議發城上大礮擊之或曰無礮臺必驚駭城垣不可輕也寇至之日城中兵勇八千餘統將數百名隸巡撫巡

湘軍志一

四

撫不敢言節度諸生及舉貢各自請領百人或二十人佐巡塚口多詣羅繞典言事布政使恆福內召潘鐸代之未至署司道周顥張其仁等莫敢與兵餉大議惟善化知縣王葆生頗好言兵諸大吏將帥亦莫之問也鮑起豹居城南樓迎城隍神大像與對坐張亮基已至甯鄉界聞警還屯常德集兵八月壬午鄧紹良將楚雄兵九百入屯南城始發礮擊外寇潘鐸至步巡城中令居民商賈各安業無恐城中被圍七日亦稍自定 詔奪塞尙阿程喬采官以徐廣縉并代之促向榮赴援向榮自四月初稱疾居桂林塞尙阿深劾之罪至遣戍榮終

不起聞塞尙阿罷乃疾行癸巳至丁酉張亮基至己亥
駱秉章解任留居城中庚子郴寇悉趣長沙益募礦夫
穴城根九月丙辰塞尙阿至諸援師大集近五萬矣尙
榮不樂居城中以寇渡湘亦率所部渡湘爲屯時獨搏
戰不利諸軍相視莫往城南戰事主於和春屯白沙井
自以扞邊爲功而江忠源以偏師與合屯或以爲忠源
之謀然寇與官軍均踰伏屯內屯外一里行人來往自
如入城者唯避南門其餘六門皆可縋以出入衢巷間
婦女媵遊酒食過從盛於平時忘其爲圍城焉丙子南
城地雷轟發城崩四丈鄧紹良部軍方集天妃祠攤錢

湘軍志一

五

博戲紹良獨拔刀當城缺斫先登一人者顛部軍聞之
皆棄錢奔城缺寇不敢上練丁輦木石塞缺口城守復
定十月己卯地雷再發不及城垣甲午地雷發城崩八
丈瞿騰龍拒缺口寇復退走於是徐廣縉方止湘潭議
者以爲合兵腹背擊寇可殲也而巡撫羣官以爲塞尙
阿在城中廣縉不宜來逼之其前軍將福興寔來乙未
夜半寇渡湘西走丙申城上訶寇屯疑空虛有呼者曰
賊去矣將帥聞報皆愕且懼無敢言賀而僚吏士民相
慶論功不復問寇所往張亮基奏請防湘潭徐廣縉以
爲寇走甯鄉遣兵南防湘鄉故寇收罷眾從容以去或

曰和春軍士賣縱之或曰非也寇不畏官軍安肯賄之
戊戌寇破益陽掠船出資口十一月己酉破岳州岳州
之防以土人領魚船五百柵土星港遏諸商賈民船萬
數寇至漁船散走悉掠兩岸人船寇勢自此盛矣諸將
唯向榮遣兵尾追陣亡副將紀冠軍湖北提督博勒恭
武道員王東槐將八百人防岳州寇至與府縣官俱走
文宗悔用徐廣縉嚴詔切責廣縉知事必敗遂益逗
留與人書自言屏息以待雷霆湖北巡撫常大澗奏留
江南提督雙福助守悉斂兵入城寇以故水陸長驅十
二月己卯湖北省城陷辛丑逮治徐廣縉以張亮基署
總督潘鐸署巡撫羅繞典以雲貴總督防荆襄曾國藩
以在籍侍郎幫辦團練丁亥遣江忠源討瀏陽土寇方
省城之被圍也瀏陽廩生王應蘋得周國虞通寇書國
虞懼殺應蘋言官發其事下巡撫張亮基猶豫未敢
發周國虞者忠義堂盜魁也忠義堂自承平時有之劫
掠私門陰署徒黨歷年不能治亮基畏其眾初作奏以
爲不足煩兵已而跂足臥且思躍起曰決矣乃遣忠源
忠源初至國虞以爲兵少易與遽襲其營官軍出眾駭
退遂逼其巢下令良民投營領牌者貸死其夜解散數
千國虞走江西斬其黨眾十餘人湖南討土寇自此起

三年正月丁未寇棄武昌東下壬戌陷安慶張亮基至湖北治軍奏以江忠源自隨是時曾國藩始至省城議練軍城中守兵四千將領多者統五百人少或百人以游擊色欽額總營務練勇成軍者有南勇瀏勇楚勇寶勇湘勇率以文員領之而同知王葆生官最大餘悉用生監新田張榮組以知州在籍頗被擢用有事輒令將以往道員張其仁爲總巡而夏廷樾裕麟爲委員號隸練得與謀議二月寇連陷江甯揚州益趨東北潘鐸奏撤兵二千餘人留沅州兵千七百防省四月鐸病免駱秉章自湖北移撫湖南江西上猶土寇犯桂東廣東陽

湘軍志一

七

山土寇犯宜章臨武永興土寇起掠安仁並遣夏廷樾率張榮組往討之軍至寇解散國藩奏重懲內姦因以便宜捕斬姦民胥隸甚眾以劉長佑王珍將練勇州縣上言積盜拒捕者輒以兵往衡山新田劫盜起皆討禽之又令在城官兵月六會操以署參將塔齊布訓練勤特奏遷一階令兼領練軍五月廣西興安恭城寇起犯永明江華藍山臨武零陵永桂官兵拒討之酃縣衡山姦民復相扇動張榮組羅澤南往捕之江甯寇分黨掠江西圍省城別遣寇黨沂江陷安慶江忠源自湖北率所部軍入南昌助守請援於湖南秉章國藩以楚勇最

有名檄寶慶知府魁聯募二千人益以湘勇千人鎮守辰沅兵六百人遣夏廷樾朱孫詒各統之而羅澤南實主其軍純用其弟子領營哨別用忠源弟忠淑率楚勇先進期會於瑞州忠淑軍於道潰散廷樾等至南昌一戰不利諸生死者七人收眾入城忠源以新軍不可用令往吉安擊土寇七月廣東樂昌寇犯興甯王珍拒走之八月南昌圍解援軍還江西太和寇陷茶陵王葆生塔齊布王珍合討之寇進陷安仁殺訓導吳棠尋退走鮑起豹以南昌圍故入城治防惡塔齊布之爲曾國藩用也長沙協清德因而間之縱提標兵圍國藩行轅國

湘軍志一

八

藩走免遂移駐衡州語在曾軍篇九月湖北防江軍潰於田鎮張亮基免吳文鎔爲總督廣東英德寇犯宜章周鳳山儲玟躬拒走之十月常甯土寇闖入治城殺典史吳世昌把總許得祿遂走嘉禾殺把總邵定太圍攻藍山團總孫紀良鍾良欽等拒戰死儲玟躬張榮組破走之十二月江忠源死於廬州始議大集兵援湖北

四年正月乙卯總督吳文鎔敗死黃州以台涌爲總督寇自武昌犯岳州巴陵知縣朱元燮死之二月乙亥寇陷湘陰西從陸道犯甯鄉曾國藩自衡州率水陸大軍浮湘東下聞寇至遣儲玟躬往援甯鄉壬午甯鄉陷攻

躬聞警馳赴之眾議以寇盛宜止屯攻躬曰賊不取正道而旁出必人少也自吾領軍皆擊土賊今遇大賊不進何以率眾及至寇方縱掠攻躬軍見寇少遂驅之寇驚走出遇掠者還相擠攻躬軍屯城外獨率十餘人卒與寇遇戰死南門羣寇傳相告官軍當來卽夜引去湘陰岳州寇聞官軍大至亦俱北還駱秉章遣朱孫詒王珍率三千人出通城攻蒲圻聞寇復至收眾保岳州三月丁未寇大上圍岳州國藩軍亦至屯南津戊申岳州軍潰退寇從而上軍還省城寇踞靖港再陷甯鄉敗湘軍三營甲子陷湘潭省城上下皆寇屯巡撫提督委戰

湘軍志一

九

事於曾軍四月庚午國藩自攻靖港寇不利布政使徐有壬按察使陶恩培會詳巡撫請奏劾侍郎曾國藩且先罷遣其軍巡撫不可城中亦不復設備辛未塔齊布大破寇於湘潭丙子湘潭靖港寇俱退走踞岳州巡撫提督上功而曾國藩請罪有 詔詰責提督鮑起豹以專閫大員不聞出戰惟會銜奏報卽日免官以塔齊布署提督塔齊布以都司署守備僅二年超擢大帥新從湘潭立功歸受印之日文武民士聚觀相歎詫雖起豹謙從亦驚喜以爲 皇上知人能任使軍氣始振焉是時依故事提督列銜在巡撫前曾國藩以事降黜銜名

又在巡撫後而塔齊布謹事國藩自比於列將徐有壬等皆詣國藩賀且謝罪 詔令國藩擇司道大員隨營主餉有壬等惴惴恐在選中國藩笑謝之謂所親曰此輩怯懦徒敗吾事雖請同行吾固當止之況不欲乎乃修船選士合謀渡湖五月岳州寇陷常德分陷龍陽澧州援軍將周鳳山胡林翼李輔朝等自龍陽退保益陽水軍方艤船不能救常德知府景星副將富勒敦同知李春暄武陵知縣朱元增死之寇留屯十五日六月戊辰朔棄城北走時武昌圍久湖北巡撫青麇以請援就餉爲名南走長沙己巳武昌陷湖南聞飢民避寇從青

湘軍志一

十

麇來者萬數人心皇怖秉章運米往迎之則潰兵數百飢悴無人色青麇至長沙留數日西保荊州 詔斬以徇台涌免楊霈爲總督庚辰提督塔齊布從曾國藩出師進攻岳州署寶慶知府魁聯以習兵事 特補岳州知府與胡林翼各將兵勇繼進署提督多順還屯常德遣江忠淑趙啟玉等自平江出攻通城七月乙卯塔齊布大破寇於岳州禽寇將曾天養梟之目三日猶視武昌羣寇聞之爲齋醮三日閏月戊辰朔克岳州甲戌江忠淑等收通城廣西土寇侵郴桂永州邊以王珍周雲耀防江華王葆生李輔朝防郴桂恭城寇犯全州增遣

陳立紀江忠濟防零陵東安八月己未曾國藩水陸軍克武昌漢陽湘軍自此名顯連州寇犯臨武參將趙永年拒走之仁化寇犯桂陽乳源寇犯宜章灌陽寇犯道州江華甯遠嘉禾王珍周雲耀及游擊駱元泰等先後合擊寇散走出境十一月賂秉章奏劾署提督多順庸劣湛酒罷之自此軍事奏報專於巡撫

五年正月總督楊需黃州師潰曾國藩分水軍還援武昌餉道阻絕水陸軍將胡林翼李孟羣彭玉麟等皆仰資湖南大發船礮火藥銀錢拯之仁化寇陷桂陽趙啟玉拒戰寇棄城還遜富川寇屯聚縣城王珍周雲耀出

湘軍志一

十一

境攻討不利二月庚戌王葆生等攻廣東連州寇破之收其城湖北省城復陷三月富川寇入犯永明王珍等自江華馳擊破之貴州寇起鎮遠沅晃戒嚴是時諸軍專備廣東邊廣西防以委永州知府黃文琛岳州防以委魁聯辰沅防以委永順知府程誥惟以不請兵餉者爲能事魁聯懃直好爭議秉章弗善也會 詔補魁聯按察使不令還省受印魁聯自以奉 特簡徑還省城秉章因劾以委軍仍降知府幕客左宗棠雅善衡承道文格格時擢廣西按察不欲往因奏以文格署按察使程誥權辰沅道但張戰功且募資助軍不以煩院司

故尤重翟誥奏補實授論薦甚力長沙知府倉景恬以失察盜鑄爲巡撫所持奉令最謹巡撫專聽左宗棠宗棠以此權重司道州縣承風如不及矣守令能者朱孫詒知寶慶陸傳應知衡州及東安賴史直湘潭孫坦澧州胡鏞湘鄉唐逢辰邵陽邵綬名雖清濁有別皆敢於爲政省城大政則鹽道裕麟委員王加敏得與操縱之柄自餘司道拱手而已於後論軍政吏治者推湖南而謫議亦自此起四月總督楊霈免以官文爲總督趙啟玉出境攻樂昌至平石南遇寇敗死寇犯宜章王葆生軍潰富川寇犯零陵陷東安執知縣賴史直五月宜章

湘軍志一

十一

寇掠臨武嘉禾增黨襲郴州陷據之王葆生等軍保永興衡陽土寇起文格遣軍合湘鄉團丁捕討寇黨破散六月通城寇入岳州邊殺臨湘知縣姚榮卿湘陰長樂團丁出新牆遏之寇退通城郴寇分陷桂陽州州民結團自衛湖南民團平江湘陰桂陽州列縣無與爲比魁聯旣罷以知府張丞實領其軍丞實辭復劾免之悉以軍隸江忠濟七月攻寇蒲圻之羊樓敗退岳州以劉長佑募千人助王珍攻東安東安陷寇已三月王珍初以八百人至寇空城出走珍屯城北江忠淑屯其東軍中無故自驚寇更還攻圍珍營戰不利俱東退四十里屯

井頭墟寇復入城踞守長佑至與珍合進八月辛卯朔
寇分走新甯全州長佑援新甯珍追餘寇寇復東北走
祁陽于道破散癸巳郴寇分掠興甯安仁邊癸卯陷永
興甲辰陷茶陵永興寇分黨旁掠官軍悉屯茶陵省城
戒嚴九月羅澤南自江西還軍援武昌江忠濟出軍會
之收通城茶陵寇走江西永新分掠酃縣王葆生等收
茶陵王珍攻桂陽州陳士杰率團丁助之收州城移軍
攻郴十月灌陽寇犯永明周雲耀入城城守十一月癸
亥城陷雲耀自剄死甲子桂陽餘寇犯甯遠趙永年拒
之下灌墟力戰死之永年雲耀皆起行伍領營兵號有
智略至是俱死營將中無復知名者始專用練勇矣乙
酉郴寇西走永明王珍劉長佑等分軍追破之珍收永
明寇陷江華長佑還師衡州十二月壬辰貴州苗寇陷
晃州圍沅州遂陷麻陽官軍躡之俱退走

湘軍志一

吉

六年正月戊辰江華寇棄城走王珍要擊破之茶陵寇
陷吉安江西列城盡爲寇踞曾國藩居南昌軍報阻絕
詔湖南出軍援應以劉長佑蕭啟江出醴陵瀏陽已
亥克萍鄉四月江忠濟攻寇通城遇伏軍潰忠濟敗死
湖北巡撫胡林翼遣軍援江西道崇陽聞敗進屯蒲圻
要寇破之軍進至瑞州寇復入掠平江湘陰前隊及長

沙北界掠醴陵攸縣茶陵走江西遣王珍屯岳州丙子
援江西軍克萬載九月辰沅軍出境援銅仁十月丁酉
王珍軍出境收通城乙亥援江西軍克分宜十一月壬
午朔克袁州癸卯胡林翼帥湘軍克武昌漢陽王珍軍
還屯岳州十二月己未援江西軍克新喻遣趙煥聯等
自茶陵收江西永甯余星元等自鄱收江西永新蓮花
廳劉拔元等自桂東收江西崇義上猶

七年正月廣西寇起興安靈川二月陷柳州遣永州防
軍二千二百人隸蔣益澧別募千五百人援廣西曾國
藩以父喪還湘鄉增遣王珍軍助劉長佑攻臨江四月

湘軍志一

西

援貴州軍收錦屏五月劉拔元等軍收龍泉六月王珍
軍收樂安援貴州軍收永從七月湖北湘軍將劉騰鴻
攻瑞州中礮死復瑞州蔣益澧克興安八月壬子王珍
卒於樂安十一月乙酉援廣西軍將黃輔鼎彭玉山攻
平樂中礮死蔣益澧克平樂十二月乙卯劉長佑蕭啟
江克臨江是年援軍四出境內無警秉章以軍餉不給
始清釐漕糧浮折減納價覈官吏中飽裁監司例取省
費億計計漕折最重者湘潭恆廿五千而納一石今乃
三千八百而納一石若市價米石二千則以一千充軍
餉以八百供縣用民減賦而國用增其後湖北江西皆

仿而行焉知縣黃洸熙方在告秉章躬造其館起之下檄令知湘鄉不由藩司文格大驚愠然無可奈何賴史直失城當議罪而更奏薦後竟補岳州知府於是文法拘格悉破矣又案揚州例推商貨貨釐設釐金局自爲收支以裕麟總之藩司列銜畫行莫問其數局庫之儲倍於藩庫秉章亦自以廉儉率下文格亦無所求取故威行於府縣貪靡之風幾革

八年正月丙午援江西軍克新淦劉長佑以疾歸三月庚辰援江西軍收宜黃崇仁四月壬子湖北湘軍將李續賓克九江乙丑援江西軍克撫州己巳克建昌蕭啟

湘軍志一

五

江以疾歸五月戊子援廣西軍克柳州時江西寇悉走浙江寇帥石大開號能合眾六年與韋昌輝謀殺楊秀清未發秀清遣之出江西昌輝敗獨還江甯殺秀清及其黨二萬大開聞變還昌輝並欲殺大開大開走因殺其母妻洪秀全又殺昌輝而召大開大開不敢還遂爲流寇貪連大眾不能剽疾避官軍而行黨眾恆數十萬故不能久屯踞援軍既進江西無寇秉章念兵合不易當遂入浙以滅寇爲期長佑啟江先後歸恐遂不樂軍事因奏請起復曾國藩奏下而詔至促國藩援浙兩湖供餉秉章議以劉蕭軍屬之及王珍舊部張運蘭軍

俱留在江西吳國佐者左宗棠所拔用方屯省城外爲中營六月丙辰遣從國藩發長沙八月胡林翼以母喪還益陽戊午援江西軍將趙煥聯等與曾國荃克吉安石寇復自福建犯江西陷瀘溪金谿安仁崇仁宜黃劉長佑至撫州拒防九月破之新城寇還走福建長佑軍以疾疫還十月壬戌李續賓敗死三河援貴州軍解黎平圍進攻古州 詔起復胡林翼仍爲湖北巡撫曾國藩改援安徽石寇復出江西蕭啟江至軍遣拒之贛州吳國佐罷還以曾國荃吉安軍及張運蘭軍從國藩屯宿松

湘軍志一

夫

九年正月石寇自南安陷桂陽縣蕭啟江躡之二月寇陷宜章興寧郴州桂陽州所過人馬連行六日夜湖南震恐寇將窺衡州自桂陽州取間道出花園堡陳士杰軍數百扼七孔橋殊不知其大至卒相遇遂憑橋發礮寇亦不知有軍於此愕而止未退而魏喻義將一軍本屯驛道當寇衝懼孤屯將移善地自山後建旗吹角而出寇見大驚遂返奔趣新田甯遠圍永州別陷嘉禾臨武悉徵諸軍將劉長佑江忠義田興恕余星元楊恆升李輔朝張榮組吳國佐李金暘段瑩器何紹彩王勛黃三清劉吉三赴急而令劉培元彭定太崔大光曹榮快

集潰卒蕭啟江還湖南劉坤一趙煥聯周寬世等領舊部王明山蕭翰慶陳金鼇鄒漢章自湖北來領水師黃澗熙新領軍屯省城亦出助攻長佑至永州寇解圍走新甯四月乙巳長佑自東安要寇新甯軍潰木山輜重盡喪收眾保新甯寇犯寶慶分圍武岡江忠義援武岡先寇五日至寇圍攻五日解去田興恕劉吉三自沅州援寶慶辛亥寇至止屯黃塘道州寇復趨新甯長佑合劉坤一江忠濬李明惠軍拒之石大開自攻祁陽防軍將王勛余星元等不能禦增遣周寬世朱品文陳湜往

湘軍志一

七

祁陽趙煥聯魏喻義陳士杰防衡陽驛道屯熊羆領寇前隊至領煥聯等退走寇不復進煥聯等還據領於是寇聚圍寶慶官軍亦皆聚屯寶慶復增遣劉嶽昭楊安臣助軍英德寇勢北趨遣蕭啟江大軍及李輔朝陳士杰魏喻義等防郴五月陽山寇犯臨武圍藍山攻甯遠陷永明賀縣寇敗江華營兵陷城縱掠而還胡林翼遣李續宜將五千餘人渡湖自安化援寶慶寇大合圍并圍田興恕趙煥聯諸軍興恕等倚城東煥聯倚城西夾資爲屯寇築壘塞其間兩軍不相聞劉長佑方從武岡西南來不敢循驛道更繞而北余星元等屯洪橋在興

恕東有眾七千留二千人守洪橋進屯柳橋以援興恕
寇攻洪橋屯破之眾軍懼長佑從麻溪渡資亦西屯
李續宜自藍田來移書問進兵路黃洵熙席寶田報書
言當直南援洪橋趙煥聯知續宜欲西自圍中與書言
當自北攻續宜乃西渡浪溪當是時圍內外水陸軍四
萬悉統於續宜然湖南名宿將皆在非續宜所能統寇
連營百餘里號三十萬日食米數千石圍及兩月野無
所掠城中倚外軍悉出穀舂資興恕等軍深壕相持寇
聞新軍至欲急破之以潰諸軍反舍東而攻西六月丁
卯續宜至長佑軍中寇方先攻長佑營續宜悉軍助守
寇敗走續宜軍乘之破寇壘七以通煥聯屯官軍大歡
其夜寇吹角滿山野集眾西渡朔日前隊出攻官軍其
後隊引而南走田興恕開壁出戰亦渡資合大軍城中
呼譟相慶寇既引去諸軍各相讓莫有言追截者七月
餘寇復陷東安續宜長佑分道赴援大開已踞廣西興
安續宜還湖北長佑軍疲亦罷田興恕趨靖州防黔邊
黃洵熙攻賀縣寇於江華唯蕭啟江追寇出境增調張
運蘭軍防郴永八月連州寇入宜章胡國安拒走之黃
洵熙襲江華寇於領東破走之以寇圍桂林復遣劉長
佑募新軍與蕭啟江繼進乙丑啟江至桂林長佑至全

州石寇自義甯欲合柳州土寇土寇閉城拒之遂走慶遠趨南丹啟江還湖南長佑遂留廣西授按察使九月張運蘭出境攻寇連州黃瀆熙陳士杰等拒寇藍山皆平之援貴州軍將兆琛周洪印等收鎮遠十二月石寇黨奔潰四出以黃瀆熙劉嶽昭屯防永桂張運蘭屯道州

十年正月田興恕授貴州提督將二萬軍出銅仁以江忠義募二千人屯綏靖蕭啟江自常德赴援四川四月永州總兵樊燮以驕倨爲巡撫所劾罷因搆于總督指目左宗棠布政使文格亦忌宗棠陰助燮總督疏聞召

湘軍志一

九

宗棠對簿武昌秉章再疏爭之奉 嚴旨命考官錢寶

青卽訊事連黃文琛王葆生等文琛固以抗直爲宗棠所抑至是保明宗棠胡林翼復力解之得不逮坐文琛等微罪奪官宗棠游軍中謁林翼及曾國藩請以偏將自效國藩等慰遣之令還湖南石寇走貴州蕭啟江卒於成都雲南寇犯四川啟江部將何勝必破之并研江甯大營潰退蘇州陷授曾國藩兩江總督乃徵張運蘭軍赴祁門固徽甯保江西五月己未劉嶽昭陳品南等出境克賀縣石寇復走武緣以四川寇亟 詔駱秉章往督軍而文格署巡撫時裕麟授廣東運使已一年奏

留治餉至是授湖北按察使留湖南按察使翟誥署布政使左宗棠將六千人從曾國藩赴江南前吉安知府黃冕議供支曾軍軍餉與裕麟合請國藩加推商貨釐語在籌餉篇八月石寇還出義甯靈川恭城戊辰犯永明 詔授翟誥爲巡撫九月己酉受印以劉嶽昭黃涪熙兩軍從秉章行未發石寇陷綏甯殺知縣吳熊陷城步殺知縣安和攻武岡以江忠義爲大將拒之城守三日寇走新甯奏留援蜀軍助攻守十月丙子寇陷東安殺知縣趙榮祺掠道州永明江華而東自藍山趨桂陽縣宜章屯將胡國安戰死寇遂仍犯南安

湘軍志一

三

十一年二月庚申駱秉章軍行於道奏翟誥浮侈罷之仍以文格署巡撫石寇後隊復自藍山走桂陽縣三月貴州寇入靖州五月 詔文格還本官以毛鴻賓爲巡撫九月石寇部黨復犯綏甯其前在貴州者復自來鳳入龍山四川軍將易佩紳募兵長沙道永順馳擊之敗績劉嶽昭軍前留湖北攻隨州聞警遣援來鳳 詔以江忠義爲貴州巡撫鴻賓以西南防急奏留領軍其詞言貴州巡撫需員云云湖南巡撫始自尊矣是秋胡林翼薨病革時密奏劾裕麟鴻賓聞之陽奏遣裕麟赴湖北因解其任裕麟久專利權兼攝兩司開敏無過狀官

吏民士用舍在其指顧一旦罷去鴻賓意益得慶遠知府陸增祥憚之官從鴻賓來用黔捐例改道員以代裕麟文格以喪歸召岳常澧道惲世臨署布政使超用李逢春解長沙縣印卽知本府又專以趙煥聯居省城領防軍總營務兵餉吏治皆有私寄異於駱秉章時云十月甲戌石寇黨陷會同十一月鴻賓奏劾周鳳山募軍冗濫因頗短湘勇不可盡用欲他省命將權悉歸湖南奏入 報聞石寇攻黔陽陷瀘溪劾江忠義委軍歸葬罷其貴州巡撫 詔改提督石寇至永明與來鳳寇合走四川

湘軍志一

三

同治元年正月席寶田等軍攻來鳳寇破之復其城劉嶽昭屯施南聞捷先上功於湖北以合擊論功布政使惲世臨始稽鉤軍需收支計足陌錢百萬當贏萬四千千扣水錢百萬當贏萬六千千悉拘製造工匠欲坐局員侵牟先奏奪王加敏官覈訊無所得貴州苗教寇起援軍出銅仁 詔授田興恕欽差大臣專治貴州軍興恕督餉湖南鴻賓怒奏停其協餉未幾興恕罷是時湖南無寇唯月報廣西貴州邊防以爲戰功西洋通商法郎西請天主教堂故地衡州湘潭皆令官清丈還之聽自修建於是士民引 聖諭黜異端焚毀教堂兼攻從

教人法郎西公使愬之 詔官修復衡永道黃文琛上
言事已定彼教主自建官修失體而湘潭已興工巡撫
恐生事募冒償修者乃罷文琛以知府張士寬攝兵備
主其事以釐稅收數不符奏劾辰沅道陸傳應傳應至
復漫謝之通判椿齡怨鴻賓劾罷已官因撫事愬總督
且及其 大喪取妾事文格時還湖南本官道武昌爲
解於總督湖南軍需局以三千金償椿齡寢其事十二
月奏以長沙知府丁寶楨率湘將至山東討擒寇寶楨
時擢陝西按察使 詔改山東

湘軍志一

三

廣東惲世臨爲布政使五月毛鴻賓遷兩廣總督世臨
代爲巡撫鴻賓以文格挾前事因劾罷之率湘軍將張
運蘭楊安臣劉德謙以行世臨既得位當奏署布政使
越次用糧儲道李明墀按察使倉景恬不能堪請病去
八月石寇部黨李復猷犯永綏時大開已於四川破散
被禽斬餘黨依復猷欲還廣東出西陽窺辰沅大集諸
軍防之湖南名將已盡世臨不習軍張文報而已復猷
遂入會同殺知縣鄧爾昌陷綏甯分走道州陳士杰拒
戰寇潰散走江華出廣西別部掠通道敗靖州防軍十
月廣東軍禽斬復猷於連州湖南以捷聞世臨本依鴻

賓以起至是鴻賓大怒世臨又追前事奏徵陸傳應自
貴州至長沙會計釐稅收數鉤考其事不能竟也稍修
小怨以飲博事羅致道府十餘人又好以訪聞案事皆
示意令自引退石贊清爲布政使守例奉行吏治不能
廉物議謹譁矣然世臨謹事巨室陽示同好惡士大夫
喜事者翕然稱之

三年五月江浙寇犯江西大增防軍踰二萬分屯諸
府自釐貨鹽茶稅興公私饒裕冗軍益多皆坐營無戰
事比於額兵而滑惰諂巧之將亦由此進咸豐以前諱
言寇入自毛鴻賓以後每奏事必言東西同警羣寇迭

湘軍志一

三

至以希大舉焉六月江甯克洪寇平防軍仍屯戍備守
四年二月憚世臨罷以李瀚章爲巡撫世臨爲政多倖
門高下任意又刻覈自以習例案明銓格於補官屢詰
難吏部而時議追咎毛鴻賓專擅威福皆自世臨發之
欲竝去此兩人然其牽引多重發難乃假例事付吏議
鴻賓世臨皆自以爲無恐及奏上竟降調世臨出不意
湘軍將以其治軍疏又力主摧稅濟東征乃率釀銀五
萬以資其歸瀚章本起湖南州縣久從曾軍無所不諳
練特喜靜鎮抑英銳頗收權歸之官舉錯又異矣三月
洪寇餘黨汪海洋等屯踞福建廣東邊議四省合擊復

增軍遣陳士杰自桂陽出仁化王永章自宜章出樂昌張義貴屯郴州四月鮑超軍自江西援陝超假歸四川遣總兵馮標等將前軍出漢陽待餉湖北餉不時發又不令其軍至省城久屯金口軍士怨望馮標等短於撫馭超軍號霆營多收降寇不樂西征乃謀而叛直掠而南欲合福建餘寇霆營剽悍有名諸軍畏之過於大寇遂自袁吉入攸殘安仁而南湖南屯軍至眾當突而過先敗趙煥聯所部軍劉德謙要之不及委所掠東走德謙軍收趙部軍械無算叛軍至桂陽縣乃遇陳士杰拒戰大破之餘千餘人逸去八月復遣羅萱彭炳武等助

湘軍志一

三

郴防悉汰并援貴州軍爲二十營以周洪印領之十二月汪海洋及叛軍皆平東南休息乃議援黔

五年以李元度爲大將出沅州攻銅仁石阡寇以周洪印等出靖州攻天柱清江苗

六年夏李瀚章遷總督劉崐爲巡撫奏罷洪印及貴州布政使兆琛軍以席寶田募新軍討苗始大用兵矣

朝議令四川湖南俱出軍兼供其餉以平黔爲期湖南鹽茶貨釐稅自海口通江浙定絀於前十之六所加東師餉稅復停因議捐輸李榕爲布政使倡言當先令巨室助資以率齊民實不能行而士民怨恨摭他事令言

官劾榕所委用者而張自牧久領黔捐局故指攻自牧
劉崐奏辨悉直之其冬增遣黃潤昌率軍出晃州克鎮
遠

八年春潤昌自施秉謀取黃平中伏死軍覆言者以陰
事復刻李榕總督李鴻章雪其事而微言榕不恤名罷
之王文韶爲布政使

九年秋湘潭姦民以縣丞於朱亭捕人賕贖夜集百餘
人劫之縣丞逃走傷死以變聞因譎言哥老會哥老會
者本起四川游民相結爲兄弟約緩急必相助軍興而
鮑超營中多四川人相效爲之湘軍亦多有初不爲姦

湘軍志一

五

利及寇平軍罷散歸無業者假以報復劫掠因又招誘
所在有之各不相屬又人猥襍并不能助緩急而官吏
諱劫盜憚緝捕儒生喜防未然往往推之哥老以張大
其勢奏報頻頻上聞 廷議以爲固有之雖詔防察終
以爲不能絕寇起既久督撫亦不復議疏防罪一聞哥
會輒上變發兵於是巡撫以湘潭至近大發省城屯軍
及旁近軍合擊軍至六千以柳萬春于高勝爲將往來
潭醴間莫測寇勢稍取民間衣物所至民亦恫喝之用
兵數月卒無所得虛張首虜而還

十年春龍楊姦民復讎殺在籍同知陳景滄父子益陽

姦民亦劫縣獄荊州聞之以爲寇大起總督郭柏蔭以聞 朝廷未得湖南奏詰問巡撫而亂民已散去言哥老會者不已因 命總督李瀚章渡湖案之罷劉峴以王文韶代之奏設保甲局而還

十一年春席寶田盡平貴州苗軍事告畢四境無所防而水陸軍如故省城城守縣火擊櫟若備寇至哥老會時有聞者軍往輒散文韶亦頗知諸軍無事坐食然不能罷貨稅捐輸益厭不復效湖南蓋貧弱矣

湖南防守篇第一

湘軍志一

美

軍興而養兵之利害盡著諸帥臣則稍稍召募而江忠源以楚勇顯然兵妒勇益甚所屯則私鬥戰敗固不救反陷之咸豐二年冬湖北大營患潮勇橫恣罷遣之歸乃益道掠公奸良民婦衢市所至焚殺愚民以爲官兵不如寇則姦人倡僞議謀通賊及結盟拜會相挺起矣會國藩既奉命幫辦巡撫團練是時湘鄉先立練局請主其事辭毋憂不出且自言行軍用兵不素習已而武昌陷湖南大震始至長沙與巡撫張亮基治守禦且上奏曰團練之難難於捐貲湖南行伍空虛以練兵爲

湘軍志二

要務自軍興以來二年有餘糜餉不爲不多調集大兵不爲不眾而往往見賊逃潰未聞有鏖戰者所用兵器皆大礮烏槍遠遠轟擊未聞有短兵交鋒者其故何哉由兵未練習無膽無藝故也今欲改弦更張於省城立一大團擇鄉民壯健樸實者招募來省練一人收一人之益練一月有一月之效又曰湖南會匪自粵逆入楚大半附之而去然猶有串子紅黑邊錢香會成羣嘯聚如東南衡永郴桂西南寶慶靖州萬山叢薄爲卵育之區有司亦深知其不可遏特不欲其禍自我而發相與掩飾彌縫苟且一日之安積數十年應殺不殺之人而

任其橫行今鄉里無賴之民囂然而不靖彼見夫命盜首犯常消搖於法外也見夫粵匪猖獗而莫制也遂以爲法律不足馮官長不足畏若非嚴刑峻法無以折其不逞之志臣欲純用重典以鋤強暴卽良民有安生之日臣身雖得殘忍嚴酷之名所不敢辭今之急務在使通省無不破之案而盡除大小各會匪則滌瑕蕩穢可期也有曾經搶掠拜會結盟者請卽用巡撫令旗恭請王命立行正法內姦旣清外寇雖至無能爲已於是立三等之法重者斬次杖斃小鞭責釋之而已不以煩府縣獄又手書告勸鄉人士耆老雖幼賤身自下之必

湘軍志二

二

與鈞禮有所布告皆通啟自名每牒府縣招致賢俊牧令雖怙舊習然親見大人尊官與鄉民諸生爲等夷亦稍稍悟悔官民否隔頗詢地方利病山野村智之士感其誠雖或不往見人人皆以曾公可與言事湖南欣欣鄉治矣國藩以十二月壬辰治軍事

三年正月丙午朔丁未寇棄武昌下犯安徽江甯湖南不受兵乃益招募教練兼令營兵防城者月六日合操撫標中軍參將塔齊布日閱所部軍訓練有法諸州縣亦時稟承國藩言所興除有上言胥隸貪恣輒捕治斬之其行館卽訛者經三月殺五十餘人文法吏大譁張

亮基移督湖廣未幾移撫山東署湖南巡撫潘鐸引疾去駱秉章復來以國藩所行異於羅繞典及諸團練大臣心誹之然見其所奏輒得 褒荅受 主知未有以難也二月常甯土寇起以劉長佑將楚勇五百人湘勇三百人往未至其縣團丁討定之陽山寇窺宜章大庾寇入桂東殺汎官以張榮組將七百人往衡山土寇起三月劉長佑破平之永興安仁茶陵時有寇發輒聞而兵隨至姦軌破散五月洪寇分黨圍南昌江忠源往援因乞師湖南以羅澤南將湘勇千二百六月辛卯起行道醴陵忠源弟忠淑將楚勇千壬辰起行道瀏陽署鹽

湘軍志二

三

道夏廷樾將營兵六百人湘勇七百丁酉起行道醴陵援軍之行也國藩念營將積敝不可用純用書生爲營官率皆生員文章以忠誠相期獎然未經行陳故以楚勇百戰者偕楚勇尙剽銳營制疏略乃命千總張登科領湘勇二十人爲前哨戒忠淑登科曰哨探必百里至瑞州待湘軍而行忠淑徂其家軍稱勁旅心芙蓉公怯驅而前中途譎言寇至譁而潰走姦民譟驚之棄軍械餉銀退保義甯留十餘日乃進七月壬申湘軍至南昌則戰城下書生爭奮搏寇寇陽退鈔其後軍敗營官附生謝邦翰童生羅鎮南易良幹羅信東戰死澤南收眾

入城於是國藩聞之以爲湘勇果可用雖敗敢深入官兵不如也江忠源初至九江奏請增兵國藩與書曰今日之極可傷恨者在兵敗不相救而已蓋調發之初徵兵一千而抽選數營或數十營卒與卒已不相習統領之將又非平日本管之官遂乖然不能以相入至於兵與勇遇尤相嫌恨桂東之役三廳兵尋殺湘勇於市江西之行鎮筭兵殺湘勇於三江口傷重者十餘人以今日營伍之習氣與調遣之成法雖聖者不能使之一心足下前奏調雲貴湖廣兵六千募勇三千合爲一萬自成一軍夫六千之兵必有一二鎮將統之其勢不能相

湘軍志二

四

下而將弁中又多卑庸無足與語者鄙意欲練鄉勇萬人概求吾黨質直曉軍事之君子將之以忠義之氣而輔之以訓練之勤相激相劑而後可以言戰也忠源未及用而江西楚勇以索賞復潰健銳者皆棄去江軍遂弱九月敗於田家鎮是時湘營制營三百六十人中營羅澤南將之左營王珍將之右營鄒壽章將之塔齊布將兵勇成二營周鳳山儲玖躬各將二營曾國葆將一營國藩仍欲充廣至六千人合忠源所將成一萬爲義師而已居湖南有寇乃佐巡撫治兵故多與軍民政事長沙協副將清德自以爲將官不統於文吏雖巡撫例

不問營操而塔齊布諂曾國藩壞營制提督鮑起豹者昏庸自喜聞清德言則揚言盛夏操兵虐軍士且提督見駐省城我不傳操敢再妄爲者軍棍從事塔齊布沮懼不敢出司道羣官皆竊喜以謂可懲多事矣提標兵固輕侮練勇倚提督益驕適湘勇試火槍傷營兵長夫因發怒吹角執旗列隊攻湘勇城上軍皆踰堞出城中驚譁國藩爲鞭試槍者以謝乃已俄而辰勇與永順兵私鬥辰勇者塔齊布所教練也提標兵益傲怒復吹角列隊討辰勇於是國藩念內鬥無已時且不治軍卽吏民益輕 朝使無以治姦軌移牒提督名捕主者提督

亦怒謾曰今如命縛詣轅門標兵洶洶滿街國藩欲斬所縛者以徇慮變猶豫未有所決營兵旣日夜游聚城中文武官閉門不肖誰何乃昌狂公圍國藩公館門公館者巡撫射圃也巡撫以爲不與已公事國藩度營兵不敢決入方治事刀矛競入刺欽差隨丁幾傷國藩乃叩巡撫垣門巡撫陽驚反謝遣所縛者縱諸亂兵不問司道以下公言曾公過操切以有此變國藩客皆憤怒以爲當上聞國藩歎曰時事方亟臣子旣不能弭大亂何敢以已事瀆君父吾甯避之耳卽日移屯衡州已而湖北事亟總督吳文鎔故國藩坐主專倚援湖南奏調

湘軍有 詔令曾國藩赴援駱秉章供支其軍巡撫亦以寇棘故手書謝國藩且召之同守省城王珍時將湘勇聞援鄂自請增募合三千人先往十月武昌寇去江忠源擢安徽巡撫兵少不能進侍郎宋晉請發湘軍援安徽時新募壯勇分擊土寇未嘗休息合會軍餉乏絀器械旗服樸陋又方議水軍造戰筏守湘初無意勤遠而鄂皖羽檄日至月三四奉 詔促出師乃議遣王珍珍既得請餉省城不復敗國藩後又罷行國藩議合併湘勇爲十營汰珍軍珍大怨望國藩初本倚珍爲大將旣以軍新集技器粗脆遠出遇寇憂必敗而珍頗易言

湘軍志二

六

兵度其才氣終不能爲下乃聽珍別將十二月江忠源死廬州

四年正月總督吳文鎔敗死黃州國藩知時事愈危勢不得出十全於是改營制以五百人爲一營其非湘鄉人各領鄉軍者隨所統爲小營凡陸軍五千餘人爲十三營水師五千人爲十營戰船二百四十坐船二百三十器用工匠米炭襍具及員弁丁夫水陸萬七千人建旗東下留羅澤南屯衡州鎮土寇 文宗以國藩一人兼統水陸軍心憂之特詔貴州提督佈克慎自黃州還赴其水營詔總督台涌會其師時寇已圍武昌台涌方

居德安而寇黨分犯通城崇陽入湘陰趨甯鄉巡撫先遣王珍會曾軍俱下寇沿洞庭者皆退走陸路游弈自如二月庚辰遣儲玟躬拒寇甯鄉雨雪步進欲與寇爭城壬午未至縣十許里縣故無城垣寇已據治所官走免眾議止待後軍玟躬奮曰自軍興寇破城百數皆待其休息或飽掠棄去耳今舍營兵起義勇奈何聞警咨起卽部分其五百人分三道鄉甯鄉寇方散掠遂乘攻之市中寇各求門出走玟躬止營郊外休士會食而躬率十餘人行衢巷撫難民寇先出者不知官軍至方還縣見街中橫尸大驚復出東門乃反遇玟躬相擠塞門

湘軍志二

七

玟躬遽前搏寇寇前後刺之玟躬及十八人盡死寇不知主將死奔相告此來者以數百人敗數千眾今止營待後軍不可當也卽夜引去合蒲圻寇眾俱去湖南境內解嚴省城湘潭初聞寇破甯鄉大懼及聞寇去知由玟躬一戰道路交頽儲石友云甯鄉人見其戰者尤感念卽日爲立祠蓋自此湘軍重赴援人人稍知榮戰死矣國藩前軍至岳州王珍先屯岳州城見寇退議進兵崇通寇大上三月寇先由蒲圻犯岳州乙巳敗王珍於羊樓丙午塔齊布復通城其日王珍退守岳州鄒壽璋屯城中謂珍曰城空無食不可守也珍不聽戊申寇至

壽璋率所部退保南津會水師而別將還保城城空軍士一日不得食王珍縋城走眾亂國藩遣礮船迎師免者千餘人潰死大半俱走保長沙寇眾乘之遂據靖港距省城六十里再犯甯鄉敗湘勇三營營官伍宏鑑戰死塔齊布自崇陽還奉檄援甯鄉會寒雨行三日未至甲子寇陷湘潭是日國藩下檄塔齊布改援湘潭使者以爲軍在甯鄉行半日遇之乃在中途距湘潭反近塔齊布亦未知湘潭已破喜於憑城保大縣以自固四月己巳朔軍長驅趨湘潭將入城乃知寇先在勢不得退寇聞有官軍至亦卽發兵拒戰迫相遇塔齊布不得退

湘軍志二

八

則馳陷陳軍士皆出薄戰寇自起與官軍未嘗短兵接相顧愕欲退其後隊望四山多負仗者以爲官軍大至則先走因相蹂官軍譟呼觀者皆譟呼遂大破之追至城乃還立營其日長沙惴惴居賊中人自以爲必敗國藩集謀攻守皆曰入城坐困宜親督戰或議先靖港奪寇屯或曰靖港敗還城下死地矣宜悉兵攻湘潭不利保衡州卽省城陷可再振也水師十營官皆至推彭玉磨決所鄉定鄉湘潭五營先發約明日國藩帥五營繼之夜半長沙鄉團來請師曰靖港寇屯中數百人不虞我可驅而走也團丁特欲藉旗鼓以威賊已作浮橋濟

師機不可失聞者皆踊躍國藩亦憂湘潭久踞思牽之
改令攻靖港庚午平旦至水急風利礮船徑逼寇屯寇
礮發船退不得上纜而行寇出小隊斫纜者水師遂大
亂陸軍至者合團丁攻寇寇出團丁遽反奔官軍亦退
爭浮橋橋以門扉牀版人多橋壞死者百餘人國藩親
仗劍督退者立令旗岸上曰過旗者斬士皆繞從旗旁
過遂大奔國藩憤自投水中章壽麟負之還船日午還
至城下而湘潭大捷報至先所遣水師距湘潭十里聞
陸軍戰勝鳴角發礮直上塔齊布軍三日三勝壬申寇
散走水師盡燒所掠船寇大敗走靖港遂俱走還岳州

湘軍志二

九

湘潭既復國藩以軍不精練悉汰所部留五千餘人因
留長沙造船增調羅澤南李孟羣陳輝龍將水陸軍圖
再舉上奏自劾而駱秉章及提督鮑超豹自上其功
文宗詔責提督卽日奪官 詔塔齊布以副將署湖南
提督方事之急也布政使徐有壬遠室走達旦明日與
按察使會詳巡撫請罷遣曾軍語倨妄甚巡撫語有壬
且待之及克湘潭國藩猶待罪俄而得 溫詔且超用
塔齊布文武官大慙沮有壬詣國藩頓首謝城中防兵
聞代大將皆驚服以爲 天子明見萬里塔齊布受提
督印則徧賞提標兵得軍功六品牌者三千人使人人

知新提督無修怨之心標兵大謹平寇功由此起五月
甲寅岳州屯寇陷常德六月己巳寇陷湖北省城時方
治水軍未能救也塔齊布屯湘陰新牆待水軍庚辰俱
進攻岳州甲申水軍渡湖丙戌焚寇舟七月戊戌朔寇
空岳州城東北屯城陵磯倚江水陸相犄角癸卯國藩
舟發長沙壬子至岳州癸丑水師三營敗績語在水軍
篇乙卯塔齊布挑戰禽斬寇帥曾天養戊午寇攻羅澤
南營出戰大破之澤南初合軍未嘗出攻寇寇以爲怯
塔齊布數激挑澤南澤南愈益閉壘至是開壁大戰遂
以勇略著聞名亞塔齊布及今並稱焉閏月戊辰朔城

湘軍志二

十

陵磯寇遜走荊州將軍官文等遣軍將會水師於螺山
塔齊布羅澤南東攻崇陽己丑陸軍破寇屯於羊樓洞
八月己亥復崇陽己酉國藩進屯金口辛亥澤南等進
屯紙坊癸丑會於金口澤南請沿江東岸攻花園寇屯
至大破之塔齊布伏兵洪山要寇路水師順流燒寇舟
於鹽關漢關鮎魚套丁巳皆破之戊午燒寇舟於漢口
盡破之己未寇棄武昌漢陽遜走署總督楊需方屯德
安一日而聞捷六日捷上聞九月辛未國藩奏至京師
文宗大說詔國藩署湖北巡撫戊寅又 詔國藩督
軍解署任以前已奪官 加賞兵部侍郎銜且以下長

江克金陵爲褒勉當是時湘軍銳甚而武漢空虛楊需度不可居又貪因人功自請合兵分三道已當北岸攻蘄廣濟塔齊布等率湘鄂陸軍趣南岸攻大冶羅澤南率湘軍攻興國所至寇破散國藩督水軍舍蘄不攻順流直進期會於田家鎮 詔戒以孤軍深入南北軍強弱不相當寇將併於江北又 詔江西巡撫以黃州寇必據九江湖口相蟻聚當先設防楊需陳啟邁不能奉行國藩急於破寇帥軍自進田鎮者張亮基江忠源敗地也鎮當江北諸山峻峙江南大山曰半壁三面斗絕山下富池口江水南趨繞山折而東故舟行依田鎮以避湍三年官軍失半壁山而敗至是寇踞山作五屯引湖溝之北自田鎮至蘄四十里沿岸築城鐵索纜江自半壁山屬之田鎮以遏舟師眾號十萬十月己亥塔齊布東攻富池口羅澤南西攻半壁山方作浮橋通兩軍寇出千餘阻谿我不得橋寇以舟渡數千人列南岸山左舟中寇數千人登陸列南岸山右山上五屯盡出眾可二萬我軍懼有逃者三人李續賓馳追斬以徇澤南戒眾分四隊令曰待令而後戰先動者斬寇三進三退澤南鼓之突將斬寇大旗將二人眾奔乘之寇反走隄於山自顛死者無算北岸來寇奔舟舟亂相推排覆溺

十餘舟我軍登舟寇輒自投江操舟者股栗不知有維楫於是擲火盡燔之遂奪半壁山絕崖斷鐵纜六寇旣失山因作大筏傍岸以固鐵纜江中橫大筏三盡鉤小船節節相牢連斷其一節明日復合用彭玉麟計分四隊椎燒其大瑣寇遂駙潰語在水軍篇田鎮旣破蘄城寇亦退走廣濟塔齊布等渡江辛酉寇逆戰破之復東攻黃梅寇連敗大懼悉驍悍謀死拒分屯小池口大河埔孔壠驛及黃梅城北相首尾每屯分四五營十一月丙寅朔攻大河埔及城北屯皆破之復黃梅癸未寇自孔壠來逆戰破走之於濯港己丑進攻孔壠燒其屯水師乘勝薄九江軍城下與寇聲相聞寇併力踞湖口城與九江相犄角我軍屢勝負戰冒礮丸犯鋒刃以相誇塔齊布以大將頻獨身陷陳受石傷水軍恆度寇壘間礮丸墮倉中可埽莫有退志塔齊布旣屯九江南門曰仰攻士死傷相繼羅澤南攻湖口苦戰不能克夜夜自戒備至不能寐聞者爲之寒心 文宗尤以爲憂屢詔楊需陳啟邁飭臬司都統副將領軍者及安徽諸軍併歸調遣湖北江西兵旣不足用安徽軍亦無由會合湘軍已深入方日謀所以勝十二月丙午水軍三營越湖口攻姑塘寇出小舟燒其坐營遂陷鄱湖不能還湖

口寇反渡江復踞小池口周鳳山往爭敗績已未寇出小舟燒國藩坐船水師遂潰

五年正月丙寅朔己巳楊需軍退漢口於是安徽九江沿邊寇盡上分三道東陷黃梅廣濟追楊需至漢口中道自小池口沿江陷黃蘄復分黨從富池渡江西陷興國通城崇陽咸甯通山且掠江西武甯率遣數百人或千人所至脅眾至漢口者後楊需二日至黃州者後需四日故需不敢入省城走保德安湖北巡撫陶恩培故湖南按察使嘗閉衡州城拒程喬采又請奪曾國藩軍者也至是恃總督在外不議守備城中兵才二千人徵

湘軍志二

三

兵半途聞警皆潰去相驚以寇至湖北江西方千里旬日騷然矣始寇之起所行無留難其踞省府脅取民財穀而已行道掠人夫不用則遣還未嘗增眾及屢敗乃結土寇屯城鎮頗收拔悍擊者而石大開陳玉成用事寇乃盛於此時矣湘軍萬餘人水陸分爲四李孟羣等水師回援武昌塔齊布留攻九江羅澤南入江西國藩收蕭捷三等水師三營屯南康澤南奔命往來復弋陽克廣信收景德攻義甯雖戰勝攻取非東南所以安危之大故不具載塔齊布以五千人留屯議者以爲頓兵無所用武而廷議多言不可解圍光祿卿王茂蔭奏

尤切 詔亦命留攻相持半年九江湖口兩城寇懾伏終不敢犯大營七月乙酉塔齊布薨於軍周鳳山代將十一月寇陷臨江瑞州移師去未幾而敗語在江西篇塔齊布之爲將襍用兵勇皆得其死力雖號姦滑者隸其部下勇毅恆先人每出戰部曲從者度非驍勁敵十人已上輒鞭之使還嘗獨拒追寇全軍還營而已一騎陷寇地投宿民舍老嫗涕泣上食爲匿馬稻秸中明日按轡徐還軍中服其神勇老師堅城卒以憤死鳳山以資級領眾自是所部弱矣湖北三陷死三巡撫故胡林翼傾身以結士倡勇敢務權略而鄂軍興

湘軍志二

古

曾軍篇弟二

湖北篇第三

湘軍志三

寇興四年而湖北軍五潰楊霈之敗也實未見寇亂民一呼而萬眾瓦解省城初才二千兵及城陷時城內外防守軍萬二千見黃旗則爭縋城走外兵亦走水師固不任城守事省城潰自保而已寇至城下用縋城繩引而上城中唯巡撫陶恩培署按察使武昌知府多山及僕從五六人恩培先赴水死多山燹城上大礮擊來寇礮不發拜祝之再然火煙出而無聲發憤自剄死布政使胡林翼按察使李孟羣皆將兵赴援屯城外副將王國才方馳入城城閉亦用縋城繩以上至藩署羣盜方

湘軍志三

一

會飲重門開列火以爲燎國才乃悟業已入因率親兵入暴斫之羣寇驚走且呼街巷間有出者輒爲官軍所斫俄傾而定城中居民固未復業至是早盡逃國才惘惘不知所爲則登城招水陸軍不見一人明日出城合林翼屯語激昂林翼心忤焉俄而寇大至知其事者交訟國才奇功遂傳言國才於道獲寇謀得口號呼門而入爲讒嫉者所蔽惟及見國才者知其實焉咸豐五年三月乙丑 詔胡林翼署湖北巡撫林翼前知鎮遠黎平治盜嚴三年冬以御史王發桂薦奉 詔赴湖北未至總督吳文鎔敗死留湖南將黔勇三百人碌碌未有

以自見曾國藩征寇奏以自隨湖南巡撫駱秉章方倚幕客左宗棠以決事宗棠故善林翼奏留防岳州捕誅崇通姦民斬刈過當已而曾軍克田鎮合兵圍九江林翼以湖北按察使領千人從攻湖口比於湘軍爲最弱及寇上陷漢陽率千八百人還援守便宜不入省城于時布政使夏廷樾爲總督所劾免 詔補林翼布政使及巡撫殉城死而林翼遂署巡撫當是時江漢上下兩岸寇充斥巡撫號令不出三十里屯金口倚水師自保增募二千六百人合王國才等軍號六千而國才屯沌口皆恃荆湘餉給軍軍無見糧寇亦易之不改也楊需

湘軍志三

二

者以結交得朝貴權假防北犯名屯德安號萬人糜餉自如四月楊需退走德安西安將軍扎拉芬來援戰死平林市西 詔奪需官以荊州將軍官文爲總督五月壬戌朔授都統西凌阿欽差大臣攻德安官文泝漢至襄陽復乘礮船下漢居潛江天門間號北岸軍西凌阿久從僧格林沁軍無統御材力不能援武漢惟水師屢克蔡店漢口及漢陽寇屯軍去旋陷林翼念相持無已時八月壬辰自將四千人渡江思合水師取漢陽不能進屯參山戊寇至林翼督軍出士卒要餉出怨言強之戰未交綏譟而大奔林翼憤甚索馬欲赴敵死圍人

見巡撫意色惡反旋馬四五轉向空野乃鞭之馬馳不能止臨江乃遇鮑超船諸營官聞巡撫在集濱卒調王國才合屯大軍山辛丑荊州運餉銀三萬至乃嚴汰疲羸奏調羅澤南軍令更增二千人還攻武漢於時水軍大將彭玉麟赴江西李孟羣改陸軍置副將楊載福爲水軍總統屯嘉魚蒲圻間益選精銳倡勇敢其所用皆以披袞當礮石爲樂巡撫禮下走卒偵事早還開營門自迎之羅澤南之在江西也日轉戰其巡撫恭倨不恆急則倚之緩則厭之曾國藩亦自以客寄莫能爲之主塔齊布薨江西事益疲澤南建議曰武漢者東南之樞

湘軍志三

三

紐也形勢百倍於潯陽今兩城久爲賊踞而崇通羣盜出沒江西湖南緣邊驛騷欲制九江之命必由武漢而下欲解武昌之圍必由崇通而入乃率所部及塔齊布部將彭三元等道義甯取通城義甯崇通間寇雖號數萬眾皆烏合脅附見湘軍輒敗走九月乙丑復通城甲戌復崇陽林翼聞援軍深入躬往迎導眾議兵少不宜先進林翼曰以難事誘客兵非也且廉恥安在勝當戰敗亦當戰已卯遣六營三千人鄉蒲圻而援寇自武昌鄉義甯眾數萬適遇官軍軍敗寇復進敗湖南防軍於羊樓澤南分兵爭羊樓而躬屯崇陽崇陽敗寇恃援復

還屯壕頭欲襲澤南軍澤南遣彭三元李杏春往攻之
癸未援寇自咸甯大至三元等軍少營陷乙酉德安寇
棄城南趨 詔奪西凌阿官官文兼代之官文先聞麥
山敗自沔陽還鍾祥至是移屯德安 詔詰責官文遷
延澤南失利令籌援兵會林翼等三面攻寇丙戌澤南
合軍拒寇於羊樓大破之十月癸巳蒲圻寇至又破之
癸卯林翼自嘉魚來勞師合澤南七營軍共十三營西
攻蒲圻寇聚三萬眾分五屯四柵作浮橋據白羊水以
通咸甯林翼用蒲圻舉人賀霽若計出間道由公安販
據城西北鐵山寇出不意盡失其險辛亥澤南精兵攻

湘軍志三

四

城東林翼軍攻城西北且循水防遏以牽寇援寇踞城
壘堅不出士卒仰攻多傷澤南令軍士積芻薪將燒其
柵寇反以火器禦之火發寇驚奔破其五壘其夜官軍
馮山鳴鼓角以驚城寇城寇遽走蒲圻復十一月庚申
朔林翼澤南合兵東攻咸甯庚午咸甯復辛未水師克
金口甲戌林翼等會水師於金口其日王國才進屯沌
口乙酉澤南五營進屯洪山林翼將四營屯省城南五
里墩城寇從高冠山望澤南築壘不出戰城外寇大壘
八小壘二環四門見林翼軍至出拒戰澤南襲之破大
壘一小壘二李孟羣軍亦薄攻漢陽水師往來江漢南

北每戰必捷而官文前軍攻漢陽者與南岸軍相聲援都興阿將馬隊護水師水師夜燒寇船未還都興阿露立達旦羣帥和輯戰士始奮矣

六年春正月江西寇患亟陷七府城議者交章請調羅軍浙江湖南巡撫皆以爲言文宗以武漢功可期持不許言者益眾詔官文等通籌利害澤南念曾國藩艱危義與同死生而垂成功不可棄日夜憂憤督戰益急自正月至二月大勝數十小戰百數寇嬰城待援士卒多傷官軍每戰輒薄城下寇陰穴城爲突門三月己未寇開城迎九江援黨澤南率師要之寇奔城追之

湘軍志三

五

突門開直衝澤南軍軍不能退澤南躬拒之三退三進軍幾潰火槍鐵子中澤南左額血霑衣猶踞坐指揮乃得收軍還乙丑創發卒於軍軍中哀泣江西湖南聞之皆歎息失氣詔以巡撫例贈卹而李續賓領其眾續賓初建議分屯窰灣絕寇糧壘成自守之與洪山屯相犄角旣代澤南仍屯洪山以游兵巡窰灣塘角間寇守益固而江西請師日數至義甯寇復犯崇通九江寇合興國大冶土寇自武昌縣進至葛店謀襲巡撫大營林翼以江西待援分軍四千一百人以劉騰鴻劉連捷等將之曾國華總其事國華國藩弟也四月丁酉援軍遇

寇蒲圻乙卯戰於羊樓丙寅再戰皆破之劉騰鴻功最騰鴻自此名顯五月 詔責官文林翼遷延老師林翼上奏言臣頓兵城下五月有餘日驅血肉之軀與礮石爲敵傷亡水陸軍三千餘人羅澤南及都司周得魁等將弁百餘人李續賓乘馬中礮墮地者數矣夫兵易募而將難求四月以後乃禁約仰攻分兵咸蒲以取義甯四戰皆捷分水師以清下游直達九江臣自率五千人扼武昌南路李續賓領六千三百人扼城東路分剿北路水師六營下駐沙口水陸之賊援絕路窮下游九江與國陸賊萬餘分道來援冀可夾擊臣卽豫撥三千餘

湘軍志三

六

人戰於百里之外且臣歷觀前史李左車之告韓信尙以頓兵城下情見勢絀爲戒戰易攻難自昔已矣臣之才力何足言兵惟材有限而志無窮萬一變生他路禍出意外臣亦不敢退怯苟且自取羞辱 詔報曰歷

述艱辛於事何益國體具在亦應寓慎重於其中蓋自

是 文宗知林翼之爲帥果有異於廬揚江甯諸將而

林翼亦益感激發舒始有志於天下非僅規營湖北而

已五月唐訓方等敗九江援寇於葛店六月寇自樊口

增召戰船復犯葛店以蔣益澧總六營往逆戰破之追

奔至樊口合水師燒其船入武昌縣城遂渡江攻黃州

十日不能克益澧聞援寇踵至議回軍丁銳義爭之曰夫兵勢宜遠料敵有方援賊之能已可見矣我屯黃州則百里義民有所歸心賊之上犯有所牽制後路大營相爲聲援且能戰不在近能守不在遠今若旋師賊必踵我踵我必戰戰此可乎諸將皆以縣軍爲憂銳義乃獨上書陳兵勢巡撫壯其議終以眾論檄軍還 詔果以撤軍爲非云益澧與續賓皆澤南弟子續賓名望日重嘗論事澤南前字益澧曰香泉欲何從益澧愠亦字續賓曰迪安乃欲相統耶及續賓代將益澧屯魯港寇大攻之請援中軍續賓報曰力不能相救守走唯公意

湘軍志三

七

益澧大沮卽升瞭樓撤其梯唯置旗鼓下令軍中曰賊勢盛吾死此矣諸軍欲走者自去眾驚愕相顧馮壘死守寇攻一日引去益澧於是告歸不待報而行七月官文邊舒興阿舒保等將馬隊四百人渡江援寇旣上於青山魯港間增十三壘相持十六日水陸合擊破之馬隊追奔至葛店寇懾於馬乃大奔自是水陸馬步相輔軍勢日盛十月襄陽土寇起鎮道發兵討捕敗績以唐訓方舒保等往隨州土寇起以鮑超文明往軍至寇遯湖北湘軍鋒銳甚乃益募陸軍五千水師十營增長圍困武昌十一月丙子寇開城遯走其日漢陽寇亦東走

丁丑李續賓等分三道追寇武昌縣水師馬隊追寇黃州江夏鄉民亦爭起要寇戊寅復武昌己卯復黃州庚辰復興國水師復蘄州民兵復蘄水十二月乙酉復廣濟壬辰李續賓率湘軍及巡撫軍九千五百人陳師九江城下都興阿楊載福合鮑超陸軍六千人屯北岸小池口自塔濟布羅澤南去後正二年而圍復合胡林翼知平寇之要不在攻戰既克省城則奏蠲江夏等四十六州縣田糧以蘇民困復牙帖開鹽釐以裕軍儲又上奏曰自古用武之地荆襄爲南北關樞而武漢其咽喉也武漢有警則鄰疆震驚南服均阻控制無術昔周室

湘軍志三

八

征淮師出江漢晉武平吳久謀荆襄據扼長江惟鄂爲要四年之中武昌三陷漢陽四陷夫善門者必扼其吭善兵者必審其勢今於武漢設立重鎮則水陸東征之師恃武漢爲根本大營有據險之勢軍士無反顧之虞軍火米糧委輸不絕傷夷疾病休養得所是則平吳之策必先保鄂明矣湖北之失在漢陽無備下游小挫賊遂長驅且東征之師孤軍下剿善戰者必傷久役者必疲傷病之人留於軍中不但誤戰亦且誤餉若以武漢之防兵更番迭代彌縫其闕則士氣常新軍行必利請於省城設陸師八千人水師二千人日夜訓練本境

亂民隨時征討則我常處其安而不處其危矣湖北牧令多不得人其已被擾者卅餘州縣元氣傷殘而良莠不分其未被擾者卅餘州縣官讎民而民且讎官夫吏治之不修兵禍之所由起也士氣之不振民心之所由變也凡下與上交接之事諉之幕友官與民交接之事諉之門丁夫州縣之所謂小事卽百姓之大事也今日之所謂小賊卽異日之大賊也五年大熱州縣乃或報災經臣駁斥在案六年大饑州縣轉不報災經臣駁斥在案以豐爲歉是病國計以歉爲豐是害民生臣恐湖北之民揭竿而起者不必學寇之再至而將盜弄於潢

湘軍志三

九

池也地方吏治撫臣專責今欲嚴禁陋習與羣吏更始請 皇上敕下部臣暫勿拘臣以文法資格行之數年或可改觀今或疑武漢兩城公私凋敝城周廿里設守爲難臣以爲蚡冒藍縷以啟山林衛文作都訓農通商是在行之以儉而訓之以勤耳苟此而不能守去之他而何益或又以爲武漢收復軍行貴速督撫將兵攻取爲急則前者收復已二次矣况今江西七府俱淪於賊四年之冬僅失九江旁軼橫出可憂方大都興阿楊載福李續賓均已東下臣宜留鎮省城與督臣通籌全局整飭吏治 文宗嘉納焉方南北岸之分軍也督撫未

相見將吏各有所統頗構同異官文以將軍受任拘於滿漢論者復爲林翼陳楊需崇綸故事林翼歎曰師克在和此何時哉既渡江見總督下令僚屬曰督撫相見前事冰釋敢再言北岸將吏長短者以造言論罪官文聞之大譴林翼又以鹽釐月三千金充督府公費兩人約爲兄弟故軍政吏治皆林翼主橐官文畫行有言巡撫權重者一無所聽而巡撫亦謹事總督推美受過湖北富强基於此

七年春正月襄陽土寇陷房竹山保康興山遂陷宜昌奏奪統兵鎮道及四縣文武官增遣巴揚阿合唐訓方

湘軍志三

十

軍討捕二月曾國藩以父喪歸委軍事於福興文俊等詔遣按察使李孟羣援廬州安徽羣寇窺羅田蘄州黃梅廣濟蘄水謀絕九江官軍孟羣將二千五百人道羅田擊英六霍山寇敗之遂克英山王國才屯黃梅進攻宿松移鮑超防黃梅四月李景湖等敗於羅田景湖戰死餘眾退保蘄小池口寇眾出攻官軍屯多隆阿大破之燒寇壘二十一五月襄陽寇平李續賓作長壕三十里塹九江城東南寇爭壕擊走之增募親軍千四百人閏五月羅田寇深入犯廣濟十里鋪南及武穴鮑超多隆阿等於十里鋪作大壘羣寇於蘄東北望天畷作

屯各相持伺隙斬東北官軍將領邢高魁等凡十營堅
勇不及超等林翼自出督師未至寇出斬水官軍敗退
屯巴河林翼至黃州汰衰羸選精銳圖再舉六月李孟
羣之師潰於霍山廣濟寇出太白湖背攻官軍王國才
移營失火被燒死李續賓渡江合攻湖寇屯破之多隆
阿鮑超等攻寇於黃梅西破其壘四十八七月庚寅舒
保等攻寇黃岡東敗之丁酉再戰於上巴河何紹彩李
續宜唐訓方等分三隊寇先攻左軍紹彩力戰續宜輩
山卷旗鈔寇中紹彩軍不利將退顧見林翼立馬陳後
軍士皆驚喜踊躍赴戰訓方等亦鼓譟乘寇大破之平

湘軍志三

十一

壘四十四進軍蘄水遂追寇及廣濟西寇走宿松太湖
八月癸亥遂克小池口林翼進至九江九月己卯朔還
武昌丙戌李續賓北渡江揚言攻宿松其夜更南渡伏
兵湖口北山是時外江內湖水師阻於一江楊載福彭
玉麟密期會攻梅家洲寇方依岫發礮拒水師聞山後
鼓角旌旗蔽山下則大潰續賓夜半射火城中寇大亂
空城走洲上寇亦走要擊盡斬之丙申進攻彭澤庚子
寇遽走復其城水師克小孤寇屯於是林翼以統帥難
其人懼軍出境而爲福濟和春勝保所牽絀奏起復曾
國藩詔林翼出境林翼奏以清釐漕糧爲湖北大政

請留整理語在籌餉篇

八年三月六安寇陷麻城舒保等將防兵屯商城聞麻城防兵敗退還增調鮑超何忠駿唐訓方等四月壬子李續賓地道攻九江城克之城寇被圍久以數千人嬰城種麥以爲食其守愈暇頻傷攻城軍林翼駐武昌增募新軍更迭代歸將士千里如家庭援寇別道內犯其屯防皆良將能自立不牽綴圍軍圍軍反時往旁近助攻凡圍九江十五月寇壞散出城者水師扼之俘斬無遺論功李續賓弟一續賓遂以能軍名天下戊午寇從光山犯陷黃安麻城官軍分應之丁卯續賓自將援黃

湘軍志三

三

安五月丙子黃安復戊寅夜麻城寇逸走壬戌蘄防將唐訓方丁銳義等破走太湖寇於界牌 詔以安徽寇事亟將合捻寇袁甲三勝保均號大帥兵力不足命續賓助勝保唐訓方助甲三俄而閩浙寇並起議者至請移和春往督師以續賓前授浙江布政使欲令赴本任倚以平寇七月廬州陷李孟羣敗潰乃定議以續賓全軍援廬州都興阿攻安慶起復曾國藩率江西湘軍援閩八月林翼以母喪歸都興阿李續賓合攻太湖丁巳克之進攻潛山癸酉克之乃分軍都興阿圍安慶續賓攻桐城九月己卯克之戊子進攻舒城寇逸走續賓進

兵三十二日深入四五百里寇壘望風潰破軍無留
行而都興阿率鮑超等軍礙安慶不能進羣寇又新破
江北大將德興阿陷六合殺翼長溫紹原渡江陷溧水
張國梁奔命勝保屯定遠日夕待援 朝廷憂皇專恃
續賓軍或議曰今久行軍疲屢勝則驕克城留屯不足
以爲聲援不留軍則後路空虛且阻塞必敗之道也宜
還桐城合都軍攻安慶則水陸馬步相輔名將精卒咸
萃於百里之內功必可成績賓以受 恩深名重恥退
且念攻城非旬日期欲出奇壁廬州蹈寇瑕遂不用其
計而發書湖北請益師續賓弟續宜將四千餘人屯黃

湘軍志三

三

岡唐訓方將三千人道英山援淮北未行林翼已持喪
還葬官文得書笑曰李九所鄉無前今軍威已振何攻
之不克豈少我哉徧示司道皆以續賓用兵如神無所
用援續賓雖請援亦不冝留軍示怯愼則進三河三河
距廬州五十里寇築大城環以九壘十月甲辰續賓悉
兵十三營先攻九壘大戰皆破平之俘斬七千官軍傷
亡過千人眾懼乃增調後軍未至寇帥陳玉成連江浦
六合廬江眾又乞援捻寇招穎壽光州羣盜合十餘萬
人日夜奔赴聲勢匆匆續賓遣輕兵迎擊於樊渡不利
寇益進軍半潰辛亥合圍圍官軍三十重連營數十里

將士狃勝聞敗先自亂續賓自搏戰不能進還營閉壘門七營已先陷寇來如牆續賓歎曰今敗矣令軍中曰見月照地而走軍皆束載而待月出續賓終恥於潰圍謀復固守軍已動遂大奔續賓馳督戰軍不復成列遂陷陳死曾國華何忠駿從之皆死國華從瑞州軍罷將赴部選官聞續賓能留學戰未半載而及於難續賓既死餘眾猶堅守丁銳義初領義中營營潰銳義突陳入續賓大營集餘眾誓同死寇環攻三日夜水火俱盡營破銳義死軍士死者數百人自餘營官皆走免五千人盡潰潰者衝寇出與寇相擠行數里寇殊不覺連大眾

湘軍志三

古

易亂而難整如此云潰軍至桐城桐城防軍俱奔寇乘之前留防四城軍皆潰不旬日四城復陷都興阿等撤圍退屯宿松起復胡林翼仍巡撫湖北十一月鮑超多隆阿拒寇宿松東北大破之軍始振十二月壬寅胡林翼受印武昌己酉出駐黃州壬子奏卹三河桐城死事道員孫守信等及副將李存漢以下三百二十人劾營官敗軍者總兵以下八人其失律戴罪者懲責以差以糧臺餉軍遲深自責請戶部主事閣敬銘來主之戊申鮑超拒寇太湖北二郎河寇自此沮

九年二月都興阿請疾以多隆阿當前敵將馬步軍五

干立蔣凝學爲大將合鮑超唐訓方軍萬五千李續宜屯黃州軍六千依林翼大營寇帥陳玉成還江浦捻寇散掠河南留太湖寇數萬相持不進是月李孟羣師潰廬州西孟羣陷寇中自盡死孟羣初起有名略旣獨將頗貪多兵不問餉所出雖將萬人勢益孤弱軍中喜用方術士有族女號仙姑辟五兵後戰死湖北人頗神之及陷寇悲歌誓死尤爲江淮所哀思三月寇帥石大開自江西犯湖南南界眾三十餘萬五月大發水陸軍援湖南凡萬二千人齎糧千里不煩湘餉六月援湘大將李續宜破寇寶慶解其城圍寇遂南走援軍還八月多

湘軍志三

五

隆阿破寇石牌石牌當安慶西南寇作大城與太湖相倚官軍攻城潛山安慶寇分道來援馬隊要擊敗之冬十月大舉攻寇太湖增余際昌等九營助戰守奪潛山之天堂奏移曾國藩屯宿松林翼移駐蘄南視師太湖十二月移駐英山安徽寇知官軍名將銳意東下則大懼安慶寇帥自出城乞援陳玉成合捻寇號十餘萬勢張甚都興阿養疾荊州多隆阿新貴重諸將不樂出其下李續宜稱母疾留湘鄉曾國藩弟國荃新克景德至黃州留之領軍不可亦南歸鮑超復求去而多隆阿稱疾唐訓方等陳說軍事各殊異林翼憂之廢寢食內計

諸將獨多隆阿沈毅權宜出於一欲下檄令圍攻軍悉受其節制曾國藩懼軍事遂決裂力言其不可或又言天堂軍孤縣宜移屯林冀國藩一日一書相謀議久之不決與書多隆阿多隆阿輒不報林翼曰兵事喜一而惡二三屈我以申人今日是也天堂拊潛太背天險不可棄今地利已得破賊必矣徑上奏以所統軍悉統於多隆阿李續宜未至亦名隸之以風示鮑超諸軍大驚曾國藩得其咨文憂疑屢日多隆阿既爲統帥遂撤太湖圍檄鮑超屯小池當前敵移蔣凝學軍爲超後援已屯新倉更在南國藩林翼危之業已聽多隆阿乃遂增

湘軍志三

六

兵寇循潛山西太湖東傍山三十里連營百數丙辰遂攻鮑超營丁巳多隆阿率凝學攻寇營以救超大戰傷亡七百餘人破寇壘十三已未寇分番攻超裨將蘇文彪段福壁守營礮丸中牀几至傍壁食以避礮丸六日夜國藩盡發宿松屯兵九千人以圍太湖撤太湖圍軍唐訓方三千人援小池林翼益調麻城防兵以千人益新倉以二千五百人合圍太湖國藩林翼又合兵二千人防羅谿埠官軍後甲子多隆阿自督軍護鮑超運道乙丑晦多隆阿以已軍入鮑超左軍屯令蘇廷彪軍出休諸軍裏創扶傷勇氣百倍

十年春正月辛未多隆阿令唐訓方移屯鮑蔣兩軍間以已右軍屯鮑超左軍營旁而令蘇廷彪還屯列隊拒寇且曰急作壘右軍壘立成訓方軍築壘甫四尺寇已至訓方苦戰多隆阿堅壁不救半日訓方軍敗退屯新倉林翼先遣金國琛將五千五百人合余際昌軍爲九千人出天堂謀夾擊所謂山內之軍也自除夕入山險冒冰雪行十日乙亥至高橫領望官軍寇屯皆在目中寇來攻敗去丁丑多隆阿益千人屯小池已卯復益五百人國藩益三千五百人屯新倉兩三日山內軍鳴角發礮山外軍亦鳴角發礮應之寇乘霧移屯近太湖辛

湘軍志二

七

卯多隆阿將五千人鮑超三千人唐訓方三千五百人蔣凝學四千人朱品隆三千五百人列陳攻寇小勝壬辰平旦分三道東攻小池西攻羅山中攻東堰東堰者寇屯也而陳玉成精兵據羅山旣合戰多隆阿併西中軍自將攻山間寇亦大出眾當之馬軍突而前寇少卻小池寇分四道鈔官軍鮑超唐訓方合擊先敗之遂合軍燒寇營東南風大急燎及山署寇棄屯走二十里軍械委積燒屯館柵壘數百俘寇三百人斬賊以萬數其夜太湖寇遯走甲午潛山寇遯走於是論功休士林翼曰潛山知縣葉兆蘭結民兵立五營爲官軍轉運使天

堂屯軍得自固功第一免論失守罪并超擢兩階奏獎
安徽宿松等四縣民團二月分蕭翰慶等六千人援浙
江未至杭州陷閏三月江南大軍潰退四月蘇州陷
詔曾國藩署兩江總督分鮑超等兵萬人屯祁門起都
興阿將江北軍分兵千人李續宜曾國荃既至軍乃復
進國荃領萬人圍安慶多隆阿領萬人攻桐城續宜領
萬人屯青草壩游擊應援七月戊申多隆阿攻桐城西
北不克寇倚桐城牽安慶又知官軍精銳在桐城設守
甚固城西北求雨領勢臨城寇作石壘環以二丈石壕
與輒壘水堡相輔已酉多隆阿躬率三千人出領後陽

列騎兵攻城夜半領後軍闖登馮壘自以官軍不能
近雖據領上無益未之備也多隆阿令二千人合築礮
臺三比曉臺成瞰寇城壘在目中寇驚以爲神功辛亥
列隊移礮置三臺於是石壘及城寇俱伏匿知困矣十
月甲戌寇援桐城號十萬多隆阿先屯挂車待之寇帥
陳玉成增壘不戰多隆阿曰賊始至而閉壁此欲老我
師也然以援城爲名而不能戰寇眾心不能知其機而
形勢已餒矣宜悉眾合擊之破其一屯餘眾自走癸未
建旗鼓率十八營分三隊薄攻之寇出戰敗還屯多隆
阿喜曰賊將走矣飛書告李續宜約夾擊時寇勢猶盛

癸未之戰斬八十人耳續宜軍屯新安渡寇又不出丙戌突攻續宜多隆阿親往援之寇復自退丁亥多隆阿謂續宜曰賊易與昨戰可知也請與共殲之戊子分軍自挂車掠寇屯而北續宜自新安渡掠屯而南寇不能守則出戰兩軍奮擊之俘千三百人拔出難民萬四千平壘館百四十追奔二十餘里玉成走廬江李續宜同援未至乙丑寇陷蘄水丙寅陷黃州分圍麻城掠黃安孝感黃陂武昌大震李續宜舒保等渡江拒之寇上掠雲夢德安隨三月寇分踞漢南悉精銳趨蘄廣濟還宿松辛丑寇至太湖多隆阿遣軍嘗之戰不利眾曰急發

湘軍志三

九

大軍拒之多隆阿曰賊新勝氣銳其來不攻我而亟戰以怒之敗矣令皆還保大營寇亦疾趨入安慶丙午多隆阿移軍集賢關壬子謀言援寇復至挂車還屯高河甲寅寇自挂車列隊耀兵而退多隆阿曰此示假道不欲戰也然彼畏我甚宜示弱以誘之設伏兩山隘戒之曰賊敗必過東東起大呼西起應之過西東亦如之勿遮道勿畱行令突騎數百躡賊曰聞呼聲而進追不得過十里乙卯親率羸軍誘寇寇進則走寇分二隊以大眾攻大營以少半追敗者至新安渡伏發斷寇後退者還擊之寇潰而東東山伏鼓而呼西山應之東西呼聲

動天地追騎馳至寇大敗爭走攻大營者亦收眾退皆走廬江胡林翼以李續宜軍弱奏增調駱秉章援蜀軍自安陸屯隨續宜屯澗口進攻德安四月陳玉成窺青草塌空虛以爲桐城軍不能遠戰復分三道來侵多隆阿分五隊拒破之 詔多隆阿以副都統幫辦官文軍務曾國藩自徽州移屯東流五月江西寇犯崇通西南邊屯軍潰遂陷興國林翼時疾病歐血強起還省城李續宜亦移屯城外於是江南咸甯蒲圻崇陽通城大冶武昌皆陷湖南軍北援寇還江西六月丙戌晦寇自蘄出太湖七月庚寅東犯潛山連屯五十里以逼桐城多

湘軍志三

三

隆阿曰安慶寇危急今不急救而致死於我此所謂聲東擊西者也我能勝之則安慶自破何爲而使賊必戰卽稱疾三日不出寇來攻出擊者輒敗還丁酉寇乃引眾攻大營多隆阿自起擊之寇頻與多隆阿戰識其旗及戰鋒銳甚後者悔其輕進稍稍引退眾乃大奔猶屯高河相持安慶之圍也林翼計曰用兵之道全軍爲上得地次之今日戰功破賊爲大復城鎮爲下古之圍者必四面無敵又兵法十則圍之若我兵困於一隅賊必以弱者居守而旁軼橫擾乘我於不及之地此危道也然不圍城則無以致賊而求戰故分三軍一軍圍兩軍

戰寇知不可敗則閒道上犯李續宜信用失人偵候不
明反張虛詞以惑續宜南北馳驅不見一寇寇既得德
安則以爲圍攻二軍搖乃南還哨馬繞太湖城以撼大
營林翼居城中不動或諫曰湖北巡撫何爲而入鄰縣
林翼曰帥府所在卽官守也此潛山太湖二城百戰得
之吾居守一二年猶不患寇寇亦竟不至林翼既還鎮
陳玉成復自英山繞宿松攻太湖屯軍登城設守三日
而寇退丁酉舒保等克德安八月丁巳朔曾國荃克安
慶語在曾軍後篇胡林翼病益甚奏以李續宜自代戊
辰 詔報可辛巳 詔曰安慶陷九載楚軍合圍胡林
翼畫策督剿攻克堅城厥功甚偉加太子太保銜給騎
都尉世職其日林翼薨多隆阿聞安慶克策桐城寇必
走留軍收城自要寇宿松先一日至寇方從潛山西趨
遇官軍驚走黃梅馬步追奔四百餘里廣濟斬黃次弟
盡復聞林翼之薨回屯挂車湖北平

湘軍志三

三

湖北篇第三

弟子清泉廖曷文校刊

江西篇第四

湘軍志四

水軍興而寇不得志於江漢則北出潛太南掠皖南以窺江西寇徒多南人樂南侵故江西尤受其禍曾國藩自九江移屯南康思整軍出江謀進取非爲江西戰守也然寇已由都昌攻饒州別由東流建德窺樂平屯景德鎮東犯祁門休甯咸豐五年二月國藩奏言以湖北安徽江西三省論之攻寇之道水路一而陸路四自漢黃蘄灑江至望江爲外一路自蘄水達宿松爲內一路自九江上興國崇通武甯爲西一路自湖口下至徽甯爲東一路四路當四軍而臣祇一軍分則力弱欲不分則事勢迫之今東路已告急矣塔齊布留五千人圍九江羅澤南以三千人攻饒州臣獨與內湖水軍相依寇眾我寡所憂方大三三月寇陷弋陽羅澤南攻克之寇還破興安踞廣信澤南至一戰大捷三日城復寇走玉山江西軍因收饒州五月崇通寇犯義甯知州葉濟英城守江西軍往援敗沒糧儲道鄧仁堃議江西民多畏寇不冑治團守奸人反因寇爲利潛相導引所至輒陷唯義甯倡義扞寇官民同心功節彌厲且葉牧嘗振湘軍達援省城爲西屏蔽其悉力赴援以風示列城今省軍無可遣唯羅軍可用巡撫以澤南客軍當還攻九江又

與曾不相能不冒言用客軍固請乃許然中止者數濟英守十九日城陷死之士民殉者千數省城震動乃遣澤南七月軍至梁口遇寇敗之寇悉眾踞杭口澤南取閒道據鼇頭連營城西北諸山寇分兩翼仰攻敗走明日登山望城中謀攻取城寇懼官軍得形便遽出爭山官軍馳下擊之寇大敗遂棄城走丙子義甯復戊寅塔齊布薨於九江澤南還南康八月攻湖口不能破上書請率所部西援武昌國藩念攻堅老我師且塔齊布在時九江猶不下今獨一澤南宜置之用武之地因聽其計更遣塔齊布舊將彭三元等從行合五千人彭三元

湘軍志四

二

者敢戰名一軍塔齊布薨軍中皆以三元當代將而周鳳山起行伍治軍號爲有條理三元徒勇故鳳山得統大眾竟僨軍事三元從羅軍亦敗死崇陽語在湖北篇澤南旣去水師無陸軍相輔以幙客李元度募平江人三千屯湖口十月澤南軍復蒲圻鼓而北行寇乘虛復入義甯敗江西官軍遂陷新昌瑞州廣東土寇出湖南入安福陷臨江合瑞州寇陷袁州江西湖南阨絕軍勢不能振江西水陸軍徒名具耳十一月周鳳山解九江圍援臨江寇分黨圍吉安知府周玉衡以先禦土寇功擢按察使未上留治城守與署知府陳宗元同登陴屢

敗寇鄧仁堃言於巡撫曰義甯可鑿也請先援吉安議者以寇蔓延宜先防省城扼章樹鎮國藩恐縣軍深入不利而巡撫貪倚湘軍則亦推以曾公意不欲不敢言調遣仁堃用司道公文露移鳳山揚言移軍往援吉安聊以固城守心而與書鳳山令自請遂不果行竟屯章樹馬

六年正月吉安守經七十日寇勢愈盛甲申城破周玉衡及文武寮吏死者四十一人自寇破諸名城唯湖北省官皆死其位吉安一府城堅守久於武昌府縣學汎屬官委員均城尤烈士民從義者比於義甯聞者莫不

湘軍志四

三

痛惜頗咎周鳳山湘軍奪氣矣二月章樹軍潰寇以數十人追鳳山大奔不能止走南昌寇進陷進賢東鄉安仁破撫州於是論者言周鳳山非將才援吉安亦敗或曰鳳山早入吉安馮城守得周玉衡左右之可皆不敗及敗湘軍無大將乃令李元度自湖口移屯撫州別遣鄧仁堃子輔綸及前平江令林源恩募新軍皆用平江人號元度所將爲楚軍輔綸等所將爲江軍是時仁堃方專省局欲倚以致餉而林源恩習平江防戰曾有功雅善李元度故委權此三人未幾建昌南康相繼陷國藩移駐省城以戰船爲行臺彭玉麟將內湖水軍屯吳

城三月羅澤南卒於武昌湖南援軍將劉長佑收萍鄉蕭啟江復萬載胡林翼分軍四千遣劉騰鴻將之以國藩弟國華主其軍道義甯收新昌上高五月畢金科將千人防饒州黃虎臣將三千五百人攻建昌六月饒州陷畢金科還南昌益師攻克之黃虎臣攻建昌輕出遇寇戰死所部軍移屯撫州七月劉騰鴻軍至瑞州國藩遣親兵四千人往會師寇避援軍攻新軍新軍敗騰鴻馳救寇退走是時江西列縣陷寇者四十餘城 朝命廣東閩浙合援而江西司道亦各私立軍赴急學政廉兆綸居河口得專饒信軍事頗警巡撫文俊襍用將領

湘軍志四

四

營軍名號無多而雅善布政使耆齡以耆齡忌鄧仁塋因言臬司子不宜將 詔下其章於曾國藩文俊因罷鄧輔綸悉以軍屬林源恩合李元度軍持寇撫州廣東和平土寇犯定安安遠信豐長甯上猶崇義雩都省城不能救軍報數月不相聞八月甯都土寇襲陷建昌遂陷鉛山貴溪圍廣信知府沈葆楨從學政督餉河口聞警還城居民蚤散走葆楨嬰空城與省軍阻絕飛書玉山告急於浙將浙將饒廷選故葆楨舅林則徐部軍有兵二千人以則徐舊恩倍道赴之廷選軍無部伍唯裨將畢定邦賴高翔頗敢戰其行軍不齎糧止不爲屯故

於赴急易至廣信之明日寇亦至以城有備圍五日而去江西恃饒信通鑑貨爲餉原聞廣信能守則以爲奇功湘軍久無功則益絀九月國藩躬視師瑞州李元度以撫州不克餉益乏乃分軍略旁縣欲募糧饋且分寇勢戊午收宜黃癸亥收崇仁是日城寇出攻江軍營官耿光宣中礮死援寇偵官軍勢弱日夜從流坊增眾襲江軍屯因縱火燒民居延及營帳林源恩杖劍叱奔者不能止軍潰源恩死元度突圍免圍撫州軍俱潰移元度屯貴溪十月寇復陷宜黃崇仁分陷金谿福建援軍將張從龍圍建昌軍潰副將陳上國戰死時 特詔起

湘軍志四

五

用黃冕知吉安府冕請率軍往以國藩弟國荃爲軍主湖南巡撫別用周鳳山領一軍軍餉悉自募合六千人又別遣援軍水陸二千一百人自長沙向吉安而贛州南安知府汪報閏周汝筠等率自募土丁禦寇計畝徵稅號曰田勇亦頗有廣東援軍田勇多至數萬皆不能戰當是時江西分爲四院司羣官居南昌一城以軍事聽諸將巡撫唯主其奏報焉袁州吉安瑞州則皆湘軍而瑞州軍最強李元度屯貴溪防廣信畢金科屯饒州金科兵最少戰最力曾國藩居水軍中江西諸軍偏伍彌縫不能有大損益然劉于涪以水軍起純用江西丁

勇段起鍾世楨樊俊等以湘人襍用江湘軍亦頗有名
劉長佑屯袁州踰八月十一月甲申朔寇將李能通啟
西門納官軍袁州復江西諸軍稍振矣丁卯曾國荃收
安福丙子湖北軍克武昌漢陽水軍乘勝至九江十二
月國藩至九江勞軍丙戌段起收建昌縣己丑湖北軍
進收瑞昌德安辛卯劉長佑進收新喻丙午湖南援軍
將劉拔元胡兼善收永甯永新蓮花廳崇義上猶

七年正月丙午瑞州圍軍將普承堯吳坤修別攻奉新
克之曾國藩至瑞州勞軍因督攻城乙卯畢金科攻寇
景德鎮丁巳遇伏死之金科臨沅人本從王國才以勇

湘軍志四

六

見知於塔齊布將千人久屯饒州列將多忌其能讒妒
之餉不時得金科益不與諸文吏相結納獨倚曾國藩
而國藩不主諸軍餉歲暮益困先是西安將軍福興將
江南大營軍千人至饒信督軍與湘將尤阻格金科軍
乏食問計府縣或謬謂金科能克景德餉可得也金科
輕軍遽往寇屯市後金科率十人間行突入寇屯寇驚
起圍之殺七人三人者傷金科所當輒顛仆踐血出走
寇死者數十憤且恥聚火器環燒之死金科之戰也負
槍腰弓挾五十矢二卒前持丈二矛八尺刀怒馬突陳
寇莫敢拒亦以輕敵故每獨勝輒無功陵侮諸將不宥

與他軍合省城委以東防漫不爲之繼及其死饒防諸軍皆潰寇掠弋陽陷鉛山饒信騷然矣二月曾國藩父喪委軍徑還湘鄉聞者以其不俟命懼嚴譴文宗先得湖南奏則給假令歸治喪比國藩奏上朝命已下於是天下知天子使臣以禮莫不感奮焉國藩既去福興至瑞州視師諸將汎以客帥遇待之福興還南昌因上奏請徵兵頗言勇丁不可用三月撫建寇東窺福建陷光澤邵武張從龍等敗退詔奪官治罪並罷文俊以耆齡代之胡林翼遣李續宜來瑞州代曾國華劉長佑攻臨江不利退屯新喻袁州三縣民以長佑師

湘軍志四

七

不擾爭率丁壯助軍軍復振四月湖南軍自桂東進攻龍泉劉拔元戰死胡兼善兼領其軍以袁州敗益遣王珍將三千人助長佑長佑已大破寇進圍臨江珍移軍吉安破援寇於水東閏五月胡兼善獲逃寇林預信誘降龍泉僞官復其城周鳳山屯吉安謬上爲已功詔下駱秉章秉章因劾鳳山事下耆齡未幾鳳山軍潰事罷不問六月胡林翼以寇犯蘄水檄李續宜還黃州起曾國荃復領吉安軍甯都寇援吉安王珍逆戰破之追奔至廣昌分軍收樂安丙寅吉安寇攻周鳳山屯軍士揚言餉匱不戰而走趙煥聯等軍從之皆潰退屯安福

曾國荃收眾並退以乏軍奪黃冕官冕言鳳山軍餉不
由己且餉多於諸軍二月福興檄鳳山還南昌調浙將
李定太合攻進賢黃冕請疾歸國荃專吉安軍事劉騰
鴻之圍瑞州也頻破援寇嘗以三百人敗萬眾作長壕
以困城中圍攻一年所役作壕壘如數萬人之攻城寇
知死乃突圍力戰七月庚辰朔騰鴻攻城中礮傷明日
更戰軍士知騰鴻志必克爭致死盡破臺壘礮丸雨下
中騰鴻脅仆弟騰鶴扶之強視語曰城不下無斂我軍
中皆泣冒礮登城斬殺強寇大半除道開門迎騰鴻尸
入治喪聞見者莫不悲壯其志以爲騰鴻能用眾也騰

湘軍志四

八

鴻於諸將位最卑名最重求所爲戰略無以異人至於
攻城以力求必克非將帥之道筮臨死一言而使士卒
忘身殉己若報私忿以成其志雖塔齊布多隆阿莫能
逮騰鴻死而所部稱精兵至今聞其名凡曾從騰鴻戰
者皆服其勇在湖南諸將中名欲過李續賓矣乙酉江
西軍將鍾世楨敗於進賢丁亥寇自撫州犯崇仁趨樂
安王珍拒破之壬辰李定太收進賢撫州寇分犯徽州
畢大鈺戰死婺源八月王珍卒於樂安以張運蘭王開
化分領其軍珍之將善以少擊眾專己自喜故初起所
至齟齬獨左宗棠奇之恆留湖南擊土寇曾國藩歸乃

遣援江西羣寇蛾聚聞珍至輒走諸軍將與珍合屯者皆推其能然珍部下無名將張運蘭等兒爲深毅於湘軍爲別派差近李續宜異乎羅澤南劉騰鴻云臨江援寇敗普承堯於峽江湖南援軍將楊虎臣屯新喻張運蘭等屯分宜未進援寇趨太平墟窺圍軍城寇皆填壕伺夾擊劉長佑留軍守壕自拒援寇江忠義蕭啟江等突陳大破寇燒其屯四十七九月丙戌李續賓合水軍克湖口彭玉麟出江克小孤景德寇合安仁金谿瀘溪土寇犯貴溪李元度拒戰不利還城固守十四日寇退趨東鄉李定太周鳳山禦之壘未成寇襲破鳳山屯殺

湘軍志四

九

虎營軍主帥遠燁遠燁名家子早入翰林祖父承瀛爲浙江巡撫還葬時殯供甚盛及寇亂黃梅姦人發其墓遠燁發憤思復讎走謁曾國藩國藩以憂歸遂游軍中時湘軍樸魯凡京朝官從軍者皆帕首腰刀習勞苦無敢鮮衣美食而遠燁雍容文儒輿服都麗雖強自刻厲趨踰言論燁如也見者傾慕皆歎曰衣冠中自有人且勸遠燁宜居幕府遠燁奮欲自將又以前上封事歷詆軍機封疆大臣大臣切齒非立奇功不足自表異乃募千人自效倚鳳山老將與合屯及寇至鳳山先走新軍見前屯破則大潰遠燁一出而軍覆身死鳳山三僨軍

三奪官江西終莫能罷其軍寇遂犯進賢復自崇仁出豐城鄱陽寇出彭澤謀牽臨江九江軍兩城圍已合寇不能進十二月乙卯克臨江劉長佑以疾歸劉坤一代領其軍蕭啟江自率所部爲統將仍與坤一會攻撫州豐城寇南趨吉水張運蘭等拒之寇還峽江

八年二月臨江餘寇合撫州眾東趨廣豐福興自河口退駐廣信建昌寇分黨入邵武建甯胡林翼奏劾福興請以李元度防浙邊 詔遣李定太而仍留李元度屯貴溪湖南增軍助圍吉安三月壬午蕭啟江劉坤一王開化合軍收崇仁甲午啟江進軍上頓渡戊戌建昌寇

湘軍志四

十

援撫州坤一迎戰破之四月壬子李續賓克九江甲寅南豐寇棄城走王開化分軍屯南豐寇復還合廣昌土寇來攻城王文瑞拒走之壬戌啟江合江軍水師將劉于瀆設間謀約內應丁卯復撫州丁卯建昌城寇出走王開化張運蘭合軍要之寇走新城己巳復建昌撫建寇多烏合土寇散處鄉野官軍進輒鈔擊然無精勁故諸軍大集輒遜悉由廣豐犯衢州進陷處州福興屯衢閩浙軍近三萬莫能拒守 詔遣運蘭等援浙五月起曾國藩督浙江軍六月召福興還京師留劉長佑軍屯防江西以張運蘭蕭啟江軍從援浙閩國藩之歸也中

外交章言宜起復國藩奏謝因言督師權輕於督撫州縣慢不奉令餽餉不繼而軍將爲人侮辱安徽浙江巡撫乃故詰問所刻關防或先謬題欽差大臣乃移文正其名以相窘謹故久居江西無所補益及去江西而入府城次第皆復以湖南援師軍餉自巡撫一人出故也軍興欲避敗莫若將一軍欲成事則必兼督撫湖南北效可睹矣然始勦義師由國藩軍將視爲轉移福興等徵調置不訾省得國藩一紙千里赴急胡林翼初從國藩及其得位行意欲倚國藩定兩江頻奏誅其屈文宗重奪情未遽強起之也浙事亟乃詔清督軍而兩

湘軍志四

七

湖江西爭願供其軍餉時國藩久謝事無舊軍諸名將後出率皆起羅王部曲獨水軍猶隸彭楊而楊載福已提督官品高於國藩由是負沈滯重望亦鬱鬱不自得更欲以和輯收眾心頗悔前者所爲是時駱秉章委事左宗棠湖南諸將伺宗棠喜怒爲輕重胡林翼治湖北軍餉最稱富強耆齡嘗嚴事國藩又以其當往浙閩無徇處嫌視文俊陳啟邁時禮敬有加三省一家號爲大和七月胡林翼以母喪歸劉長佑移屯建昌八月國藩自湖北入九江至湖口徵軍萬二千其將名者張運蘭蕭啟江朱品隆吳國佐時浙江已解嚴寇屯崇安連營

及建甯邵武分黨還攻廣豐玉山李元度守玉山分軍援廣豐寇走德興元度獨將一營從國藩而悉以平江軍隸沈葆楨邵武寇復出瀘溪劉長佑戰不利遂陷金谿安仁張運蘭尾之收安仁吳國佐新出銳欲攻寇與運蘭期合戰先入被襲軍敗劉本傑陷寇死本傑久佐王珍軍負時名以不能騎爲追寇所殺運蘭失期故不敗寇亦略新城東走而劉長佑北攻金谿寇大破之寇悉走福建邊國藩移屯建昌吉安寇東犯宜黃將悉趨邵武曾國荃等乃作浮橋水陸合圍寇結大筏衝橋婁斷輒續之寇懼頗有降者方寇之起以輕軍剽駭爲利

湘軍志四

三

及石大開出始脅大眾所至踞守姦愚民多從之大開怯戰而寇黨新附不自固見圍則又悔懼思反正袁臨既以誘撫克定吉安民亦潛通官軍寇將亦奉大開令期會福建乘贛水駕小舟繫大筏順流遜走餘眾潰散戊午夜收吉安江西列城皆復十月劉長佑軍疾疫移屯撫州疫甚還湖南散遣羸病因留募新軍張運蘭進軍邵武寇復還江西南掠信豐北犯景德李續賓覆軍廬州官文急奏國藩自助十一月寇自信豐犯南安國藩奏言今臣當援皖而江西寇東南斜距千餘里勢不能合并分遣蕭啟江援贛南以張運蘭吳國佐攻景德

吉安軍將朱品隆等爲親軍從屯建昌寇踞景德牽大軍議者言宜急擊吳國佐者左宗棠所拔用以童生領軍奏叙主簿張運蘭積功至道員湘軍法營官不相統者無階級皆平等統將雖九品官其營哨官至一二品階聽命唯謹運蘭號爲大人國佐部曲亦號國佐爲大人以敵之國佐喜言兵運蘭拙訥然自命宿將積不相能又用金谿失期事相怨望而國藩欲其互相濟固命同往十二月庚申合攻景德王文瑞吳國佐當中路張運蘭分左右繼進文瑞等接戰寇退走運蘭復失期寇見無繼還鈔官軍國佐禦之寇遂直前攻文瑞復分鈔

湘軍志四

三

其右文瑞國佐戰且退死者百五十四人於是國佐上書求退文瑞亦不直運蘭已已運蘭獨攻寇寇伏無聲久之白旗數十騎臨水欲渡促擊之皆還走竟不出戰日暮運蘭収眾寇吹角出大眾乘之運蘭反旆渡水文瑞揮眾繼進寇敗去保景德罷國佐軍還湖南運蘭自此專景德戰事其後朱品隆唐義訓李榕諸軍皆以持重不戰全軍爲上及李續宜諸部將成大吉毛有銘等專求自全湘軍鋒銳始頓矣劉騰鶴等自吉安移屯九江以應湖北

九年正月蕭啟江至贛州寇屯新城墟眾號數萬己丑

啟江遣田勇三千誘之寇爭出赴利啟江揮軍推鋒直
進大敗之明日寇出彊眾數千啟江分軍迭戰又敗之
毀其屯辛卯寇設伏誘田勇田勇貪鹵獲倚湘軍無所
畏集者四萬啟江曰眾而不整必敗禁之不可遇伏果
敗蹂湘軍人相閒廁湘軍敗胡中和等力戰斷後死者
二百六十四人癸巳啟江復獨挑戰寇不出辛丑官軍
遂至城下南安故有二城夾水寇分屯相倚軍至皆棄
而走啟江約軍屯城外作壘自固令曰入城者斬二月
壬寅朔寇果還南城癸卯攻之寇敗走啟江喜曰寇狡
而弱吾直驅之耳遂入城城寇亦走乘勝攻信豐辛亥

湘軍志四

西

寇悉走趨郴桂閩浙餘寇皆趨郴桂所謂石大開三十
萬眾後圍寶慶者也安徽寇自婺源走建德窺彭澤劉
騰鶴拒戰辛酉敗之玉虹橋己巳進攻建德寇礮中火
藥軍驚潰騰鶴死之國藩移屯撫州增遣撫州屯將屈
蟠戍湖口益募三千五百人裨朱品隆更以張岳齡凌
蔭廷爲營官調玉山防軍助攻景德而檄蕭啟江自吉
安還援湖南五月曾國荃至軍率朱品隆等軍五千八
百人助張運蘭景德軍相持七月寇久益懈水陸二萬
人莫冒先進國荃至乃令移屯敗援寇於浮梁南六月
大雨水軍將任星元合劉于瀆乘水進燒寇屯寇走浮

